

Sudeutsa asaktsa Sesus harere bo hȳ mykaranaha sibo ziwatahaka

Tubabatu Deus Sudeutsa isopykwytsa nisispirikpo asahi iharere bo tsikaeni zuba ma zikaha iwaze aty ja Sudeutsa bo ziwatahaka, Sesus soho ty nisispirikpoko. Sesus zuba Deus bo mymyoktyhyrykta atahi myhyrizikwanikita ana hi ziwataha. Deus hyrikoso ituk niapykyryk tahi iwatahi Deus harere ziwataha. Abaka katsa kino niwatihi Sesus soho humo tanymyryky.

Deus tse babata.

¹ Tapara Deus taparaktsa bo ziknapamykysoko iharere ziwabykynaha. Hawa hatsa myzotsa Sudeutsa bo ziknapamykysokonaha. Deus so-hokotsa taparaktsa bo iharere ziknatsasokonaha. ² Abaka Deus tatse mybo zipeha, atahi Deus harere mybo motsasoko. Atahi mybarawy nizukni Deus harere eze. Deus isuknihyize ipe:

— Mybarawy tsizubarēna abo nyny my — niy.

³ Atahi imysapyrēnikita my. Atahi imykyzonikita my. Deus wata my, hawa Deus mykara mymywatawyky. Iharere humo mybarawy ezektsa bo pisapywyky. Mybarawy iharere humo wasani mykara. Atahi mysapyzekenihyrikosokda iwaze mymysapybyitsa tsikykaranaha tismoewynahaze atahi mymyokzohik. Iwaze bijoikpe bo nido. Deus humo ba hawa tohi zikaha ibaze tadyhy. Deus tihy:

— Kapanuryk taba dyhyty — niy.

Deus tse bijoikpe iknyktsitsa ahatsa soho.

⁴ Atahi taparakta my. Bijoikpe iknyktsitsa Deus tsumuēhĩtsitsa simysapyrētsa maha atakta tsimysapyrēta babata my. Deus bijoikpe iknyktsitsa soho — Ikiahatsa katsumuēhĩtsitsa tsimaha — my.

Deus ipe niy: — O katse babata tsimy — my

⁵ Ba bijoikpe iknykta soho Deus ipe: — Ikia katse tsimy. Aba azo mozik — niy.

Ana harere ty hi batu tyso. Iwaze tihi: — Ikia kape kazo asopyk.

Utakta ipe katse my — niy.

Anaharere batu bijoikpe iknyktsa bo ziky.

⁶ Iwaze Deus tse babata estuba zubata mybarawy bo zipehaze Deus tihi:

— Bijoikpe iknyktsitsa sizubarētsa katsumuēhĩtsitsa ibo mynasakibazikiknahaktsa!

“Ikiaakta tsamysapyrēta. Ahumo mykurētsa hỹ” tsimaha — niy.

⁷ Deus harere papeu humo bijoikpe iknyktsa soho botu ziwatahakanaha.

— Bijoikpe iknyktsitsa katsumuēhĩtsitsa maha.

Mysipehaze aidytsa mykaranaha zopok waha.

Deus harere bo ma mykaranaha.

Asaktsa imysapybara izo hyrity watsa — niy.

⁸ Itse soho zuba Deus harere papeu humo tihi:

— Ikia zuba mybarawy ezeaktsa tysipehakakta.

Awahi abazubata tsimy.

Hawa tsimykara ba zimyi wasani tsimykara.

⁹ Hawa ha ty tisapyrēna hỹ tynakara, hawa ha ty batu isapy batu hỹ tynakara.

Iwatahi Deus zawatawyhik ba iakyri tabo zikozonaha.

Atuktsa sakurētsa moziknaha, ikia zuba akubabata — niy.

¹⁰ Deus harere niwatihi papeu humo:

— Ikia abazubata koikny bakta tu mybarawy tsikzukni.

Ikia hi bijoikpe tsikzukni wytyk tsikzukni.

¹¹ Mybarawy mopykba. Ikiakta awahi tsimynapykyk ba zikokza.

Mybarawy mysuk isapy barawa mozik.

Hawa mysuk mysykbaikze mopapykiknaha.

Anawahi mybarawy mysapybyrize mohokda.

Iwaze Deus usa mybarawy isapyzeken mozokni.

¹² Hawa mysuk ty zozozo tsimaha iwaze usta mysuk tsikorobyknaha.

Ikia mybarawy mopykze iwaze usa mybarawy isapyzeken mozokni.

Ikia zuba koikny baktatu astatu tsimy, ba zik tsaikba.

Awahi amysapyrēta — niy.

¹³ Deus bijoikpe iknykta humo batu ziky iwatahi batu ipe my:

— Kabaze dyhy ty! Kapanuryk taba dyhy ty!

Bykyze kazikwy humo asukyrytsitsa aharere bo hȳ mykaranaha — niy.

¹⁴ Bijoiupe iknyktsitsa hawa mykaranaha. Asaktsa sihyrikosotsa maha. Deus tsumuēh̄tsitsa maha. Deus tyryktsa bo mysiakzoko, mysitsumuēh̄naha. Deus tyryktsa Sesus Kiristu humo simysapyrētsa moziknaha, iwaze sibo Deus bijoikpe iknyktsitsa mysiakzoko.

2

Deus harere tsiwabytoktokonahaktsa.

¹ Deus tse babata mybo ziakzo iwatahi iharere bo tsiwabytoktokonahaktsa! Iharere wasani zuba. Pykyhytu iharere bo hỹ tynakaranaha iwaze myspirikporëtsa tsimoziknaha. ² Deus harere taparaktsa bo nitsasokonahaze bijoikpe iknyktsa ana ty hi hỹ nikaranaha. Anaharere bo myzotsa batu h̃y nikaranaha iwatsahi sinini nikaranaha.

³ Katsaktsa ja. Abaka Deus wasania ty tsipi-wabytoktokonaha zeka Deus pe myzo mysopyk. Deus wasania ty tywabyziu ahabyizeka batu Deus pe myzo mysopyk. Sinini tsimykaranaha h̃y. Myzotsa watsa sinini tsimykaranaha. Bijoi kpe iknyktsitsa batu mybo tyso hawa Deus pe myzo mysopyk. Sesus abazuba tahi ituktsa bo Deus wasania ty nitsaso. Hawa Deus pe myzo mysopyk sibo nitsasoko. Iwaze asahi:

— Nawa ha ty botu tsiwabynaha iharere baba, ana humo kino wasani h̃y — niaha. Iwaze ituktsa mybo nitsasokonaha.

⁴ Iwaze Deus siharere bo yh̃y mykara. Tahyrikoso humo hi amy ty kytsa batu zikaha asatu mykaranaha. Deus hyrikoso situk mynapykyryk iwaze aparakbaha mozororobanaha, Deus zikwy humo. Deus isapyha ty aparakbaha bo nyny niy. Deus hyrikoso situk mynapykyryk iwatsahi kytsa sipybyrëtsa. Iwaha humo Deus siharere bo yh̃y mykara. Iwatsahi wasania ty ahabyi zeka sinini tsimykaranaha.

— *Sesus Kiristu Deus zipehata Deus bo mymyoktyhyryk* —.

⁵ Iwaze mybarawy mopykze Deus usa mybarawy mozokni. Deus hi:

— Mybarawy ezytyk ezektsa ahaharere bo yhỹ mykaranaha — niy. Ana kino bijoikpe iknyktsitsa batu tyso. Katsaktsa mybarawy ezektsa bo nit-saso. ⁶ Aty Deus harere botu ziwatahaka:

— Kazo kytsa asaktsa nisisukni sipunihikbyitsa maha.

Iwatsatuze asaktsa ba zikspiriktsokda.

Sihumo tsimypokzitsiukrẽta.

⁷ Abaka bijoikpe ezektsa sihyrizikwanitsa. Mybarawy ezektsa batu.

Aiba tohi mybarawy ezytyk myze mybarawy ezektsa myhyrizikwanitsa tsimoziknaha,

Deus humo aparakbaha sizubarẽtsa myharere bo yhỹ mykaranaha.

Simysapyrẽtsa moziknaha — niy.

⁸ Abaka mybarawy ezektsa ispehatsabyitsa.

Aiba tohi zuba mybarawy ezytyk ezektsa mysipeha.

⁹ Abaka Sesus bo iktsa tsimaha. Deus wytyk bo zipehaze jokboa tu mywata niyzik. Bijoi-kpe iknyktsitsa sihyrizikwanitsa niyziknaha. Abaka mekybotu my. Sesus nihyrikosokda humo atahi abazubata mozik. Aparakbaha iharere bo zuba hyỹ mykaranaha. Deus mywatu imypokzitsi iwatahi Sesus mysapyzekenihyrikosokda. ¹⁰ Deusta koikny bakta tu mybarawy nizukni. Tsizubarẽna nizukni. Iwatahi mybarawy ezektsa tatuktu mysisapy

tsihikik, ihyrytsa moziknaha anawahi mozihikik. Iwatahi Sesus mymyoktyhyrykta mysapyzeken sinini nikara, wasani my. Deus aparakbaha humo tsimypokzitsiukrêta iwatahi itse babata mysapyzeken sinini nikaraze — wasani my — Deus niy.

¹¹ Sesus humo mywatu simysapyrêtsa moziknaha. Deus tse babata humo simysapyrêtsa moziknaha. Sisapyrênikitsakta Deus hyrytsa maha. Iwaze Sesus myzubaha okze:

— O asakta simysapyrêtsa maha utakta ispe: “katukytsa” kasopyk — niy. ¹² Hawa nitsaso botu Deus harere papeu humo ziwatahaka. Ata tihi:

— Kazo asoho katukytsa bo motsasoko,
izumubanhaze abo mosakibaziki

“O kazo ikia tsamysapyrêta” — niy.

¹³ Deus harere papeu humo ziwatahazo. Ta tihi:

— Utakta Deus humo kaspirikporêta iwatahi iharere bo hyÿ iky — niy.

Ata tihizo: — Utakta kahyrytsa tuk my-napykyryk. Deus hi isty kabo nyny niy — niy.

Iwa botu ziwatahaka Deus harere papeu humo Sesus soho ziwatahaka.

¹⁴ Sesus mybarawy ezekta mywata niyzik. My-barawy ezektsa ihyrytsa tsimoziknaha. Mytsani myspu tsimaha iwatahi mywata niyzik. My-barawy ezekta tuze mohyrikosokda ziky. Ni-hyrikosokdaze hyrikoso sapybara nisipehakata, Satanasinarokota, Sesus humo zikwybyita niyzik. Sesus ba hawa tohi zikzukni iwatahi Satanasinarokota zikwybyita niyzik. Tapara Satanasinarokota myzubaha

zikhnamykbabaka abaka batu, Sesus tahyrikosokdawy humo iwaze Satanas myzuba myhyrikosokdawy batu ziky.

¹⁵ Mybarawy ezektsa batu mohyrikosokda tsihikiknaha. Pibytuhukutu tahapyby myziykyknaha. Tahapetu sisopyk tihi:

— Utakta ba zikara — mynakaranaha. Sesus hi mysapyzekenihyrikosokda. Abaka mywatu ispe:

— Tsimyhyrikosokdanaha zeka ahapyby byihu ja — my. ¹⁶ Sesus bijoikpe iknyktsitsa ba ziksitsumuēhī. Mybarawy ezektsa Abarão tsekokatsa asa hi mysitsumuēhīkī asaktsa ihumo simysapyrētsa moziknaha. Atahi Deus bo mysioқтыhyryk. ¹⁷ Iwatahi mybarawy ezektsa Deus bo mysioқтыhyrykta itukytsa wata niyzik. Mybarawy ezekta niyzik. Sesus taparakta Deus wahoro zubata eze ziknapamykysokota wata niyzik. Atakta Deus tsumuēhītsa my, Sesus niwatihi. Deus tsumuēhītsa my. Ziknapamykysokota mybarawy ezektsa nisitsumuēhīkī Sesus niwatihi mybarawy ezektsa nisitsumuēhīkī. Mybarawy ezektsa humo tsimpokzitsiukrēta hỹ. Sesus Deus harere bo hỹ ziknakara, iwatahi imysapyrēnikita my mybarawy ezektsa sapyzekenihyrikosokda iwa Deus bo nisiokтыhyryk iwatahi mywatu ihumo simysapyrētsa moziknaha, iwatsahi Deus pe:

— Myzo — mysopyk. Deus mype:

— Kahyrytsa ahasapybyikitsa tsikykaranaha Sesus humo pahaokzo — iwa Deus mykara. ¹⁸ Sesus sinini nikara. Satanas hyrikoso sapybara ty zimyiwy tsihikik naha zetu batu hỹ niy. Iwatahi Sesus mybarawy ezektsa mysitsumuēhī. Asaktsa ustsya mysimiwy tsihikiknaha

ata hi mysitsumuēhĩkĩ iwatsahi wasani zuba yhỹ mykaranaha. Iwatsahi batu simyi ana humo hi Sesus mybarawy ezekta niyzik iwatahi mywatu namytsumuēhĩkĩ.

3

Moises Deus tsumuēhĩtsa. Sesus Deus tse babata.

¹ Iwatsahi Sesus soho humo mytsatziutaha katukytsa! Deus nimywatawy ityryktsa tsimozik-naha. Sesus hi mybo nitsasoko Deus zipehata my mywata niyzik. Atakta ziknapamykysokota taparakta myhyrizikwani. Utsa bo tihi zeka:

— O katsakta Sesus mymyoktyhyrykta humo myspirikporētsa tsimoziknaha iwatahi mymytsumuēhĩkĩ hỹ — tsimaha. Iwatsahi Sesus soho humo mytsatziutaha! my. ² Ata kino Deus harere humo hyỹ ziknakara, iharere humo pykyhytu hyỹ ziknakara. Moises Deus harere bo yhỹ ziknakara. Atahi Deus tyryktsa nisihyrinomyryky. Sesus kino niwatihĩ Deus harere humo pykyhytu hyỹ ziknakara. ³ Atakta abazubata. Sesus abazubatahi Moiesta jokboata tu iwatahi Sesus harere bo hyỹ tsimykaranahaze wasani tsimykaranaha. Kytsa wahoro mozoknikinahaze katsakta:

— O awahoro tisapyrēta ikia asopykziurēta — tsikaha. Maku tsihyrinomyrēta iwahoro nizukniki naha humo. Moiesta jokboata tu zuba myhyrizikwani my. Deus Sesus soho:

— Ikia abazubata — my. Iharere abazubata my. ⁴ Kytsa wahoro zuba nizuknikinaha. Deusta mybarawy tsizubarēna nizukni.

⁵ Moises Deus hyriziktsokzawy wasani ziknakara. Deus tyryktsa nisihyrinomyryky iwa

tarabaja ziknakara. Hawa Deus mykara nisi-hyrinymyryky. Deus tyryktsa humo tsimypokzitsiukrêta atakta Deus tsumuêhĩtsa zuba.

⁶ Sesus Kiristu hi Deus isopyk katse babata my. Atahi Deus hyrytsa humo tsimypokzitsiukrêta hỹ. Katsaktsa Deus hyrytsa tsimaha, atakta myperytsa zubata. Mypunihikrêtsa zeka katsa tihi:

— O Sesus humo mysapyrêtsa tsimoziknaha, mywahi Deus tuk tsimynapykyryknaha ana humo ka mykurêtsa hỹ — tsimaha.

Deus tyryktsa iziuha bo tsimypupunaha.

⁷ Iwatsahi Sudeutsa siakbatsa ba siwa zikaha! Tubabatu Deus hyrikoso sisoho ziwatahaka:

— Abaka kaharere tsiwabynahaktsa!

⁸ Kaharere tsiwabyahaze batu hỹ tsimaha iwaze batu tyso.

Taparaktsa ahadiritsa kaharere bo batu hỹ ziknakaranaha sioktsiokanikitsa.

Jerukbara eze tuze kaharere bo batu ma zikaha.

Tahapetu sisopyk:

⁹ “O katsaktsa mysapybyitsa tsimykaranaha zeka Deus myhumo batu iakyri” nikaranaha.

Sitsyhyryze kazikwy iwatawy iwatsa tu kaharere bo batu hỹ ziknakaranaha.

¹⁰ Kuarêta nityktseheze ziknasitsumuêhĩkĩ iwatsa tu kaharere bo batu hỹ ziknakaranaha.

Iwaze sihumo takyriki.

Kapetu kasopyk: “O simysapybyitsa soho humo mytsaty ziknakaranaha.

Kasopyk humo batu sihyrinymyry iwatsahi zikmyikinaha” iky.

¹¹ Iwatahi ikykubyrisorokbyize

batu aty tohi katuk zikapykyryk iky — Deus hyrikoso niy.

Deus harere hi papeu humo botu ziwataha.

¹² O katukytsa pykyhytutaha! Hawa mytsaty tsimykaranaha pykyhytutaha! Deus koikny bakta tu tawahi my atahi zinymyrybata. Hawa ja isapybara bo mytsaty tsimykaranaha zeka tamyikik tsimaha. Iwaze Deus harere humo batu hỹ tsimykaranaha iwatsahi pykyhytutaha! AhamySPIHIKBATA byihuja! ¹³ Pibiyituhukutu tyharape kusuknikinahaktsa! Iwaze tsimahaze ba ahamyiwu. Deus mydiritsa siakbatsa pe:

— Aba kaharere humo hyỹ tahaktsa — niy. Deus kino myhumo niwatihi — Abaka kaharere humo hyỹ tahaktsa! — my, iwaze tyharape punihikwynahaktsa kytsa! Sesus Kiristu humo tsikaha spirikpotohinaha.

¹⁴ Tapara Sesus humo ahaspirikporẽtsa ihumo ahakurẽtsa tsikyziknaha. Iharere wasani tsimaha. Ihumo tyspirikponaha! Kyze mywahi ituk tsinapykyryknaha. Tsimyhyrikosokdanahaze Kiristu watsa tsimoziknaha. ¹⁵ Deus harere papeu humo:

— Abaka kaharere bo wabytaha!

Kaharere tsiwabytahnaze batu hỹ iwa batu tyso.

Taparaktsa ahadiritsa kaharere bo batu ma ziknakaranaha

Ba siwa zikaha! — niy.

¹⁶ Mydiritsa Deus harere ziwabynaha. Mydiritsa Deus harere humo batu hỹ ziknakaranaha. Asaktsa Moises Esito ekze nisioktyhyryk nahatsa.

¹⁷ Asaktsa jerukbara buruk niukurunaha. Isapybara ty nikananaha ana humo hi Deus takyriki, iwatsahi jerukbara buruk niukurunaha. Kuarēta nityktseheze ziharamuze. Anaeze sizubarētsa niakbanaha. ¹⁸ Asa kino Deus harere bo batu hỹ ziknakaranaha. Iwatahi Deus hi:
— Iziuha botu nikymy ba zikapykyryknaha — niy. Iwa hỹ niy.

¹⁹ Iwatahi ziuha Deus botu nikymyze ba zikpupunaha. Iharere humo batu hỹ ziknakaranaha, iwatsahi iziuha bo ba zikpupunaha.

4

¹ Deus hi mybo nitsasoko tahi:

— Iziuha aha bo ikymyba anaeze tsimypykyryknaha — niy. Katsaktsa pykyhytu tsimahaktsa! Imysapybara ty tsimykaranaha zeka tsimyiwyknaha! Deus harere humo zuba hyỹ tahaktsa. Iwaze iziuha bo tsinapupunahaktsa! ² Mydiritsa siakbatsa Deus harere ziwabynaha. Ana ty hi batu hỹ ziknakaranaha. Deus nisisapywy tsihikik batu zik asahi iharere humo batu hỹ ziknakaranaha. Katsa kino niwatihi Deus wasania ty tsiwabyknaha. Pykyhytutaha anaharere humo hyỹ tsimahaktsa!

³ Katsaktsa ihumo myspirikporētsa iwatsahi iziuha bo abaka tsimynapupunaha. Anaeze tsimymybyrynaha. Hawa Deus byrykywy katsa kino niwatihi tsimymybyrynaha. Deus mybarawy nizuknibaze tabyryky, tahyriziktsokzawy zipykze tabyryky. Katsa

kino niwatihi iziuha eze tsimybyry tsihikiknaha.
 Taparaktsa mydiritsa siakbatsa Deus sisoho tihi:

— Iziuha eze botu ahabo ikymyba
 ba zikabyry — niy.

Sihumo takyriki iwa niy.

⁴ Deus tabyrywy soho iharere papeu humo ziwatahaka:

— Nawa zuruze usta tsyhyry humo estuba zuba
 ziakbataze Deus mybarawy nizukni.

Kyze nawa zuruze usta tsyhyry humo petok
 ziakbataze tabyryky tahyriktsokzawy
 zipyke — niy.

Deus harere papeu humo ibyrykywy soho.

⁵ Deus harere papeu humo ziwatahazo mydiritsa siakbatsa soho:

— Iziuha eze botu ikymyba ba zikabyry — niy.

⁶ Deus iziuha bo kytsa mynapupunaha mozihikik. Asaktsa mydiritsa siakbatsa hi iziuha eze Deus botu sitsyhyryze zikymyba, ba zikpupunaha, anaeze ba zikabyry. Iharere humo ma zikahabyitsa tuze iziuha bo batu paku paku. Iwaze Deus ustsya kytsa iziuha bo mynapupunaha iwa mozihikik. ⁷ Bykyze iwatahi usta zuruze soho:

— Abaka kaharere humo hyĩ tsimaha — niy.
 Deus harere Dawi ziwatahaka hi:

— Abaka kaharere bo wabytaha!

Kaharere tsiwabytaha zeka ahasopyk-sapyhu ja — niy.

Iwa Dawi tsekokatsa ziwatahaka.

⁸ Sosue nihyrikosokdata Deus tyryktsa, Kanaã bo nisioktyhyryk. Deus iziuha nisioktykyryk zeka Deus usta zuruze soho:

— Abaka kaharere bo hyĩ tsimaha — batu tyso. Nawa Dawi ziwatahaka ustsá tyryktsa soho niy. Asahi Deus iziuhá bo mynapupunaha. ⁹ Iwatahi Deus hyrytsa pe niy:

— Kahudikhudikwy tisapyrēna bo tynapupunahaktsa! — my. Deus mybarawy nizuknize iwaze tabyryky. Tabyryky nahawatihí kátsa kino tsimymybyrynaha anawahi Deus mozihikik.

¹⁰ Deus sapy iziuhá bo tsinapupunaha zeka tsimymybyrynaha. Myhyriziktsokzawy mopyk. Hawa Deus tabyrykyze kátsa kino tsimymybyrynaha hĩ. ¹¹ Iwatsahi Deus hudikhudikwy tisapyrēna boktsa! Ana soho bo hí mytsatziutahaktsa! Mykubyrisorokrētsa tsimoziknaha iwaze iziuhá bo tsimaha. Ba siakbatsa wá zikaha. Asaktsa Deus harere humo batu hĩ ziknakaranaha iwatsahi Deus hudikhudikwy bo bá zikpupunaha.

¹² Deus harere ka simyharerewabytsa wata my. Iharere mynamyhyrinymyryky. Deus harere tsipiwabynahaze hawa há ty mytsaty tsimykaránaha mymywatawyky. Hawa tsimyzihikiknaha mymywatawyky. Mytsaty tsimykaránahaze hawa há ty wasani my Deus harere mymywatawy. Mytsaty tsimykaránahaze hawa há ty batu isapy iharere mymywatawy. Deus harere sokorotsapu wata. Sokorotsapu titsarirēta, petok taba itsariwyhyta tawata. Siraratsa nízzykyrywy wata. (Ipoiiktsa sotsokowy buruk máha sokorotsapu tuk tsizykwynaha. Iwatsahi myraratsani sipoiiktsa iknyktsa tsiboknaha.) Hawa sokorotsapu myraratsani metutu mykara nawaze Deus

harere hawa mytsaty tsimykaranaha hawa tsimyzihikiknaha metutu mykara.

¹³ Deus zinyba hỹ, katsa ba ijokbyi bo zikaha. Hawa tsimykaranaha zinyba. Tsimyhyrikosok-danahaze atahi mymywaby. Tsimytsasonahaze:

— O nawa ikykara — botu ziny iwaze hawa tsimytsasonahaha wasani tsimaha zeka tsihyrinymyrēta. Iwatsahi mydiritsa watsa byitahaktsa! Deus harere bo hyỹ tsimahaktsa iwaze Deus hudikhudikwy tisapyrēna bo tsimypupunaha

Sesus ziknapamykysokota babata myhumo tsimypokzitsiarēta.

¹⁴ Tubabatu taparakta ziknapamykysokota Deus wahoro zubata bo ziknatsukuk. Iwatahi Deus tse babata bjoikpe bo nitsuk Deus tuk. Atahi abazubata. Iwatsahi ihumo tsimyspirikpotohinaha.

¹⁵ Taparakta Deus wahoro zubata eze sizubarētsa nisitsumuēhĩkĩ. Asaktsa batu sipunihik nisitsumuēhĩkĩ. Sesus hi mymytsumuēhĩkĩ atahi mybarawy eze ziknapykyrykze sinini ziknakara. Iwatahi mymytsumuēhĩkĩ. Satanas zimyiwy tsihikik Sesus iharere bo batu hỹ ziknakara. Iwaze Satanas nimymiwy tsihikikze Sesus mymytsumuēhĩkĩ myhumo tsimypokzitsiukrēta. Atahi mymypokzitsiki ta mywata niyzik. Hawa haty tsimykaranaha zinyba iwatahi mymytsumuēhĩkĩ. ¹⁶ Iwatsahi Sesus bo tsipomokonaha. Mysikpybybyitsa Deus myzo bo tsimypamykysobanaha. Mypunihikrētsaktsa! Deus myzo hi mymysapywyikik. Myhumo tsimypokzitsiukrēta. Mypunihikbyitsa zeka

atahi mymytsumuēhĩkĩ. Iwatsahi mypunihikrētsa tsimoziknaha.

5

¹ Hawa taparaktsa Deus wahoro zubata eze ziknapamykysokonahatsa siwatawyhytsa niyzik naha motsasoko. Deus nisiwatawy kytsa tu nisiwatawy. Iwaze kytsa nisitsumuēhĩnaha ana humo hi Deus nisiwatawy. Nawa ha ty kytsa Deus bo zibiakaknaha ana kino Deus bo nyny niaha. Aparakbaha humo nyny ziknakaranaha. Deus okzeka myraratsa nisiwezokonaha iwatahi Deus sitsihitsa humo batu iakyri simysapybyitsa nikaranaha nisiokzohik.

² Sipunihikbyitsa tu iwatsahi harape humo simypokzitsiukrētsa niaha. Asaktsa zimyikinahatsa humo simypokzitsiukrētsa. Asaktsa batu sihyrinymyry niwatihi sihumo simypokzitsiukrētsa. Taparaktsa Deus wahoro zubata eze ziknapamykysokonahatsa sipunihikbyitsa kino nikaranaha. Iwatsahi ustsaha humo simypokzitsiukrētsa niaha. ³ Asaktsa kytsa watsa. Iwaze myraratsa Deus okzeka nisiwezokonahaze asahi:

— O Deus kamysapybyita tu ikykara iwatahi karara ty ikia bo nyny my iwaze tsikokzohik. Iwaze ikia kape:

“Amysapybyita tu tsikykara paokzohik myraratsa tsihitsa niwatihi simysapybyitsa tu nikaranaha iwaze myraratsa ty kabo nyny tsimykara iwaze mysiokzohik my” — nikaranaha. ⁴ Batu aty tohi ziktawatawy ziknapamykysokota zikyzyk. Batu. Deus humo

maku ziknapamykysokota mozik ata hi maku ziwatawy. Arõ tapara ziknapamykysokota niy. Deus humo iwatawyhyta niyzik.

⁵ Taparaktsa Deus wahoro zubata eze ziknapamykysokonahatsa siwatsa Kiristu mynakara. Siwatsa ba ziktawatawy, Deus hi ziwatawy. Iwatawyhyta tu Deus ipe niy:

— Ikiakta katse, abaka azo mozik — Deus niy.

⁶ Usta harere Deus papeu humo ziwatahaka:

— Merikisedek wata tsimozik.

Merikisedek Deus ziknapamykysokota Deus wahoro zubata eze ziknakara.

Aparakbaha nisibetesaka Sesus iwata katyryktsa tysitsumuẽhĩ mynakara.

Mysibetesaka, tawahi mysitsumuẽhĩkĩ Deus harere papeu humo niy.

⁷ Sesus mybarawy ezekta tu Deus bo ziknapamykysoko. Deus bo hua hua niy, ihyritsik zipoko. Deus zikwybata tu nizihikik zeka ziaксе iwa zeka batu zikyrikosokda. Iwaze Deus zitsumuẽhĩkĩ Sesus tasoho bo zuba batu mytsaty ziknakara, tazo bo zuba mytsaty ziknakara. Iharere bo zuba hyỹ ziknakara. Iwatahi Deus iharere ziwabyky.

⁸ Atakta Deus tse babata niy. Iwatatu sinini ziknakara ana humo hi Deus harere bo hyỹ ziknakara. Sinini nikara atahi Deus harere bo hyỹ ziknakara ana humo hi zinymyryky. Anahumo ihyriziktsokzawy nikymyba. ⁹ Atakta tsimysapyrẽta. Imysapyrẽnikita tu mybarawy ezektsa Deus bo mysioқтыhyryk. Asaktsa iharere bo zuba

hyĩ mykaranaha, ihumo simysapyrẽtsa mozik-naha. Deus tuk tahawahi mynapykyryknaha.

¹⁰ Deus Sesus pe niy:

— Ikia zuba tapara ziknapamykysokota tsi-mozik. Merikisedek wata tsimozik. Mybarawy ezektsa tysitsumuẽhĩ mynakara, koikny bakta tu tawahi mysitsumuẽhĩkĩ — Deus niy.

Deus harere tsipinymyrytohinaha.

¹¹ Tapara ziknapamykysokota niy. Hawa Sesus Kiristu Merikisedek wata pahayrinymyrykyzyky. Hawa ha ty tsihokdaharẽna batu ahawabyhy. Ana harere tsihokdaharẽna humo batu wabyziu zikaha.

¹²⁻¹³ Tapara Deus harere bo hyĩ tsimykarana-haze hawa batu ihokdaha ahayrinymyrẽtsa. Hawa wasani batu ahayrinymyry. Hawa batu imysapy batu ahayrinymyry. Ikiatsa sibikyhytsa watsa tsimaha. Ibykyhy taje tsotsik pezuku tawata tsimaha. Ibykyhy myzoho bazikboro ikiaatsa iwatsa tsimaha. Aibani zuba ibykyhy siraratsani piboro. Iwaze ikiaatsa Deus soho tsimysihyrinymyrynahatsa watsa ustsakysa zuba pahayrinymyrykynaha. Ikiatsa hawa ha ty wasani ahape tu ahasopyk iwatsahi ahamysapyrẽtsa tsimoziknaha. Batu ba hawa tsihokdaharẽna batu ahayrinymyry iwatsahi sibikyhytsa watsa.

¹⁴ Aty skaraba Deus harere bo zuba hyĩ mynakara hawaha tsihokdaharẽna pinymyryky, iwaze tsimysapyrẽta mozik. Asaktsa siypyktsa watsa maha, asahi myzoho piboronaha. Hawa Deus okzeka wasani my sihyrinymyrẽtsa, hawaha ty batu sapy sihyrinymyrẽtsa niwatihi.

Sispirikporētsa moziknaha. Tahapetu sisopyk iwatsahi sispirikporētsa moziknaha. Iwatsahi siypyktsa watsaktsa kytsa Deus harere piwabyziukunaha.

6

¹ Kiristu harere, nawa ha ty botu tsiwaby-naha ana soho bo hi mytsaty mytsaty byitaha! Ana myspirikpowy batu ihokdaha hỹ. Ana myspirikpowy:

— Ahamysapybyitsa tsikykaranaha ana humo hi Deus tuk batu tsinapykyryknaha iwatsahi tsmoewynaha! Deus harere bo hyỹ tsimykaranaha iwatsahi tsmyspirikpokonaha.

² Pihik ty myharasusuwy! Utsa kytsa tahatsyhyrypetsa ty ahaharek humo paik mahaze Deus hyrikoso ahatuk mynapykyryk. Deus siakbatsa nasihyrizikpobazo. Asaktsa Deus harere bo batu hỹ mykaranaha Deus sinini ykarawy bo mysipeha — niy. Ana kino botu tsinymyrynaha abaka usta myspirikpowy tsiwabytoktokonahaktsa! Iwaze tsipinymyrybanahaktsa kytsa. ³ Iwatahi ana hi tsihokdaharēna ahabo tsimytsasoziukunaha. Katsa hi:

— O Deus ikia tynamytsumuēhĩkta tsimahaktsa!
— tsimaha.

⁴ Kiristu harere zimoewynahatsa hawa ja ni-aha. Tubabatu Kiristu harere ziwabynahaze iharere bo yhỹ niaha. Deus hyrikoso situk niapykyryk. ⁵ Asahi:

— O Deus harere tisapyrēna hỹ — nikaranaha. Hawa ha ty kytsa batu zik Deus mykaraze, iwaze asa tihi:

— O Deus zikwyrēnikita my. Ata hi zuba mybo mynasikzo ana ty hi mykara — nikaranaha. Ihumo sipybyrētsa. ⁶ Iwaze Kiristu zerekeknaha ihumo batu sispirikpo niaha. Simysapybyitsa nikaranaha batu isty erek batu zikaha. Sesus Kiristu humo mospirikpozonahaze batu zikaha. Nispirikpobyinahatsa tu kytsa watsa asaktsa Deus tse iharapatawyhyta humo pihyritzikyzykzonaha. Deus tse pimyjakanaha. Asahi Deus tuk ba zikakpykyknaha.

⁷ Hawa mytsuhuk humo mymywatawyky. Mytsuhuk piokirywynaha. Hyritsik mynawōze siriktsa moziponaha. Iwaze mydisahawyrētsa tsi-moziknaha. Iwa Deus nimysapywyky. ⁸ Usa waratok batu isapy my. Tserekrēna. Towahaditsa zuba mopykyryknaha. Anahi waratok batu mydisahawyky iwa zeka taoketarahoko. Waratok batu sapy hỹ. Na wata asaktsa Kiristu zerekeknahatsa tu Deus sinini ykarawy bo mysipeha.

⁹ — O katukytsa ikiahatsa mekywa tu tsimoziknaha. Asaktsa Kiristu zerekeknahatsa batu si-watsa tsimaha. Kiristu humo ahamysapyrētsa tsi-moziknaha. Sesus humo tsimyspirikpotohinaha — tsimaha.

¹⁰ Ikiahatsa Deus hyriziktsokzawy humo tsikykaranaha. Tapara ahatukytsa tsiksitsumuēhĩknaha. Kiristu tuktsa humo tsipokzitsinaha. Abaka niwatihi Deus tyryktsa mysitsumuēhĩnaha. Iwaze Deus humo ahamypokzitsarētsa tsi-piwatawykynaha. Ana

humo kino Deus ba zikspiriktsokda iwaze pahasapywykyry. Atakta imysapyrēnikita tu pahasapywyky. ¹¹ Sesus myziksizo iwatsahi taperykynaha. Taperykynahaze tuharapepokz-itsikinahaktsa! Tyharape tsumuēhītohinahaktsa! Anaeze tu tsimyzihihikiknaha. ¹² Ahazikabyrihuja! Pykyhytuty ahahyrihiziktsokzawy humo tahaktsa! Kytsa asaktsa tubabatu Deus humo sispirikporētsa babatsa siwatahaktsa! Deus ispe niy:

— Aibani pahasapywyky — niy. Siakubyrisorokrētsa tu ziperykynaha bykyze Deus isapyhanikia ty sibo nyny niy. Siwatsa tsimahaktsa kytsa! Ahakubyrisoroku ja tsimaha.

Hawa ha ty Deus nitsaso atsatu mykara.

¹³⁻¹⁵ Taparakta Abarão iwa niy. Atakta tispihikrēta. Deus ipe niy:

— Ikia pasapywyky. Kazikwy humo atse mopuruk ihumo atsekokatsa sizubarētsa moziknaha. Kaharere wasani atsa tyty mykara — Deus niy. Atakta tsimiharere wabyrēta tu iharere wasani hỹ, atsatu nikara. Abarão iharere bo hyỹ nikara. Tapetu isopyk:

— Deus katse ty kabo nyny my — nikara. Tispihikrēta niapykyk. Iwatahi Deus harere humo itse nipuruk. Deus harere wasani nikara. Iwa hỹ.

¹⁶ Katsaktsa tsimytsaso tsihikiknahaze — Myharere wasani hỹ — my iwaze Deus okzeka myharere wasaniha. Katsa hi:

— O Deus ziknyba hawa motsasoko wasani mykara — my. Iwaze kytsa mysoho iharere wasani my. Hawaha motsaso atsatu mykara

maha. Iwaze ba zikahapebetsaknaha, wasape nikara.

¹⁷ Deus kino niwatihi tatyryktsa pe:

— Utakta pahasapywyky ikiahatsa katuk ahawahi tsimynapykyryknaha — niy. Ityryktsa bo ziknapamykysoko atahi:

— Kaharere wasani my. Utakta koikny baktatu kaharere atsatu mykara. Kaharere zuba — niy.

¹⁸ Deus mype niy:

— Utakta pahasapywyky — niy. Ata tihizo:

— Kaharere babaka wasani mykara — niy. Ana harere soho batu mytsaty my. Tozeka ja ba harere mykara. Batu ba. Deus ba zikmypsipihik-bata iharere humo wasani my. Iwatsahi mypuni-hikrëtsa! Katsaktsa botu Deus pe:

— O myzo ikia humo mysapyrëtsa tsimoziknaha — tsikaha. Iwatsahi taperykynaha! Atakta mymysapywyky, ihumo mysapyrëtsa tsimoziknaha ana hi taperyky iharere humo taperyky.

¹⁹ Deus humo mysapyrëtsa tsimoziknaha, mywahi ituk tsimynapykyryknaha iwatsahi taperykynaha. Iwatsahi mypunihikrëtsa. Iharere humo mykurëtsa. Deus harere humo batu mypyby atahi mymysapywyky iwatsahi mykurëtsa tsimoziknaha. Deus tuk mywahi tsimynapykyryknaha ana hi taperykynaha.

Tubabatu taparaktsa Deus wahoro zubata eze ziknapamykysokonahatsa Deus sapy eze ipokpedawy bo nikaranaha. Atahi tapara ziknapamykysokota anaeze nitsuk hokbowy ty panu hi iokpezawy ty ana bo hi nitsuk Deus bo ziknapamykysoko myraratsa spu Deus bo nyny niy. Kytsa tsyhyryze Deus bo ziknapamykysoko.

Sesus niwatihi bijoikpe bo nitsuk. Anaeze Deus bo isapyha ty nyny niy. Anaeze Deus mopykyk naha bo hi nitsuk iwaze isapyha ty nyny niy ziknapamykysokota wata. Abaka Deus baze atahi mytsyhyryze mynapamykysoko.

²⁰ Tapara Sesus bijoikpe bo nido. Myharaze Deus bo niy. Atahi tapara inapamykysokota niyzik. Iwatahi mytsyhyryze Deus bo napamykysoko, anaeze Merikisedek wata ityryktsa tawahi mysitsumuëhĩkĩ. Aibani Deus bo mymyoktyhyryk ana hi taperykynaha.

7

Merikisedek Serusarêhe zipehata Deus bo ziknapamykysota niwatihi.

¹ Abaka Merikisedek soho motsaso. Atakta Serusarêhe ezektsa bo zipehata niy. Kytsa tsyhyryze Deus bo ziknapamykysoikik. Taparakta Abarão tasukyrytsitsa bo niwatoroko, nipykze tawahoro bo ziksikiri. Ske buruk Merikisedek zihobyk. Merikisedek ipe niy:

— Deus zuba pasapywyky, isapyrënikia ty abo nyny my — niy.

² Abarão niwatorokoze tasukyrytsitsa namy ziaksebaik. Sinamy ty tsapukte buruk tuze iwaze ibo zibiakak. Tsizubarëna ty ibo nyny niy. Inamy mytsyhyrytsa sepyk nawaha estuba ibo nyny niy usta namy ty are niy. Iwa Merikisedek bo zibiakak. Merikisedek zinaro piwatawy tihi:

— Atakta tatyryktsa humo wasani ziknasipehaka — my. Serusarêhe hudikhudikwy ezekta mypehakatsa niy. Serusarêhe hudikhudikwy naro piwatawy.

— Ata humo ihyrytsa sakurētsa moziknaha — my. ³ Deus harere Merikisedekzo soho ty batu tyso. Taje soho ty batu tyso. Tadiritsa soho ty batu tyso. Tapurukwy ty batu tyso. Tahyrikosokdawy ty batu tyso. Atakta Deus tse babata wata niy. Deus bo ziknapamykysoikik. Merikisedek ityryktsa bo tawahi nisitsumuēhĩkĩ.

⁴ Atahi tsimyharrerewabyrēta nawa ha ty ahabo motsasoko. Isoho bo mytsatzyiutahaktsa! Abarão mydiri taparakta tu tanamy ty tsapukte buruk zibiakak. Taparaktsa sisukyrytsitsa namy ziake ana kino nyny niy. Abarão isoho bo mytsaty nikara:

— O atahi tsimysapyrēta my — niy. Iwa mytsaty nikara. ⁵ Tubabatu Abarão tsekokatsa Rewi inarokota Moises ihyrytsa pe:

— Ahatukytsa tahanamy ty tsapukte buruk ahabo pibiakaknaha. Ikiahatsa Deus wahoro zubata eze ziknapamykysonahatsa humo tahanamy ty tsapukte buruk ahabo nyny maha. Sinamy mytsyhyrytsawa sepyk nawa mahaze estuba ahabo nyny maha — niy. Iwa Moises harere papeu humo ziwatahaka. Rewi hyrytsa tahatukytsa namy ty zikziaksekenaha, namy ty sibo zikzibiakaknaha. Sizubarētsa Abarão tsekokatsa ni-aha iwatuze tahatukytsa namy ty sibo nyny nikaranaha.

⁶ Merikisedek mekywa tu niy. Atakta batu Rewi tukytsabyita niy, usta mekta tukytsa tu niy. Iwatatu Abarão tanamy ty ibo zibiakak. Inamy mytsyhyrytsawa sepyk nawaha ty estuba myze ibo nyny niy. Tapara Deus Abarão pe:

— Naka ahudikhudikwy mozik. Atsekokatsa sizubarētsa moziknaha — niy. Iwa Deus harere

Abarão pe niy. Kyze Merikisedek Abarão pe niy:

— Deus pasapywyky ahumo tsimypokzitsiukrêta — niy. ⁷ Abarão ihyrizikwani ibo nitsaso. Merikisedek tihi:

— Deus pasapywy ahumo tsimypokzitsiukrêta — niy. Aty anaharere motsasoko tsimyharerewabyrêta hỹ. Atakta isoho motsasoko abazubata kytsa iharere bo ma nikaranaha. ⁸ Kytsa sizubarêtsa Deus wahoro zubata eze ziknapamykysonahatsa tahanamy ty sibo nyny mykaranaha. Asaktsa hawa eze mohyrikosokdanaha. Merikisedek batu ata hi meky watu my. Deus harere hi:

— Merikisedek ispitu my — niy. Iwaze Abarão tanamy ty tsapukte buruk ibo zibiakak.

⁹⁻¹⁰ Merikisedek ske buruk Abarão zihobykze batu itsekokatsaka. Rewi itsekoka ipurukbyize, aibani zuba nipuruk, iwaze itsekokatsa Abarão eze tu niapykyryk. Iwaze Abarão tanamy ty tsapukte buruk ibo zibiakakze Rewi Abarão tsekokatsa tadiri tuk my, iwatahi ata kino niwatihi ibo nyny niy. Ipurukbyita tu tadiri tuk inamy ty Merikisedek bo nyny niy. Atakta tapara ziknapamykysonahatsa Deus wahoro zubata eze sibo abaktsa kytsa sinamy pibiakaknaha. Ata hi Merikisedek bo inamy ty nyny niy.

¹¹ Asaktsa Deus wahoro zubata eze ziknapamykysonahatsa mymyhyrinymyrykynaha. Iwatsahi Deus harere bo zuba hyỹ tsimykaranahaze mysapyrêtsa tsmoziknaha ana hi sihyriziktsokzawy maha. Rewi tsekokatsa Deus wahoro zubata eze ziknapamykysonahatsa tu batu sipunihik, Deus harere sihumo

tsihokdahaŕeña. Iwatahi Deus usta ziwatawy atakta mytsyhyryze ziknapamykysokota niyzik. Kiristu ziwatawy. Atahi Deus wahoro zubata eze ziknapamykysokota niyzikze, batu Rewi tsekokatsa watsa, ata hi Merikisedek wata niyzik. Kiristu zikwy mytuk mynapykyryk iwatsahi Deus harere bo hyŕ tsimykaranaha. Ihumo mysapyrẽtsa tsimoziknaha.

¹² Rewi tsekokatsa Moises harere humo Deus wahoro zubata eze ziknapamykysonahatsa. Abaka Deus usta ziwatawy, ityryktsa sitsyhyryze ziknapamykysokota niyzik. Abarão hi atakta koikny baktatu Rewi tsekokatsa sisapyzeken niyzik. Rewi tsekokatsa humo ba mysapyrẽtsa tsimoziknaha ba zikyknaha. Kiristu humo zuba mysapyrẽtsa tsimoziknaha iwatahi Deus ziwatawy. Abaka Moises harere humo batu myhyrinomyry tsihikik, Kiristu harere bo zuba hyŕ tsimykaranaha. ¹³⁻¹⁴ Atakta Deus zipehata mybetesatsa mozik batu Rewi tsekokatsa niy. Deus ipe niy:

— Ikiã katyryktsa tsyhyryze kawahoro zubata eze tynapamykysokota tsimozik — niy. Atahi batu Rewi tsekokatsa niy. Atakta Suda tsekokatsa niy. Moises batu tyso Suda tsekokatsa soho:

— Ikiãhatsa Deus wahoro zubata eze ziknapamykysonahatsa anaeze myraratsa mysiwezona iwaze myraratsa ty Deus bo nyny tsimykaranaha — iwa Moises batu tyso.

Usta ziknapamykysokota Merikisedek wata.

¹⁵ Iwatahi Rewi tsekokatsa Deus wahoro zubata ziknapamykysonahatsa batu ihyriziktsokzaha zikaha. Deus usta zipehata sisapy ziaксе.

Sesus Kiristu zipehata Merikisedek wata my. ¹⁶ Atahi Deus wahoro zubata eze mynapamykysota niyzik. Kytsa harere humo, batu mynapamykysota niyzik batu sisopykwy humo kino niwatihi mynapamykysota niyzik. Atahi ispitu my, koikny bakta tu iwatahi Deus wahoro zubata eze mynapamykysokota niyzik. ¹⁷ Deus harere isoho papeu humo botu ziwataha: — Ikia kawahoro zubata eze tynapamykysokota.

Kahyrytsa tsyhyryze tynapamykysoko awahi tysitsumuēhīkī hỹ,

Merikisedek wata tynakara — niy.
Deus harere papeu humo ziwatahaka.

¹⁸ Asaktsa Moises harere bo yhỹ nikaranaha batu sipunihik, ana harere humo aparakbaha Deus bo ba ziksioktyhyryk. Iwatahi Deus hi:

— Moises sopyk humo ba tsimyzurukunaha. Kaharere, abaka humo zuba hyỹtahaktsa kytsa! — Deus niy. ¹⁹ Moises sopykwy humo ba mysapytsa zikyziknaha. Sesus hi Deus bo mymyoktyhyryk ata humo hi Deus okzeka mysapyrētsa tsimoziknaha, iwatsahi taperykynaha.

²⁰ Deus Sesus ziwatawyze iwahoro zubata eze mynapamykysokota mozik. Atahi:

— Pawatawyhik kawahoro zubata eze mynapamykysokota botu iktsaso atsatu mykara. Utakta koikny bakta tu my kaharere botu iktsaso wasani mykara — niy.

Tapara Rewi tsekokatsa nisiwatawyze iwahoro zubata eze ziknapamykysonahatsa niyziknaha ana harere ty batu tyso nisiny zuba niy. Sesus bo zuba ana harere nitsasoko. ²¹ Deus harere papeu humo:

— Ikia kawahoro zubata eze tynapamykysokota,
 kahyrytsa tsyhyryze awahi tysitsumuēhĩkĩ.
 Ahyriziktsokzawy batu zikpykba
 awahi tynapamykysokota tsimy — niy.
 Deus harere wasani my ba meky watu mytsaty
 tykara.

²² — Nawa ha ty botu iktsaso atsatu mykara
 — niy. Iwa Deus Sesus pe zuba niy. Iwatahi
 iharere abaka wasani mykara. Sesus humo zuba
 ana harere abaka bazimy wasani Moises Deus
 harere nitsasoko ana harere wasani niy. Iharere
 abaka Sesus pe wasani.

²³ Rewi tsekokatsa Deus wahoro zubata
 eze ziknapamykysonahatsa nikananaha.
 Ziknahyrikosokzakanahaze mektsatu
 ziknaharape sapyzestykynaha. Iwa hỹ. ²⁴ Sesus
 ta mekywa tu my. Koikny bakta tu batu
 aty tohi zisapyzesty. Sesus zuba tawahi
 mynapamykysokota my. ²⁵ Iwatahi izikwy
 humo mysapyrētsa tsimoziknaha. Katsa Deus
 pe tsimykaranahaze:

— O myzo Sesus humo myspirikporētsa iwata-
 sahi abo tsimypamykysokonaha. Ikia humo ka
 mykurētsa — tsimaha. Iwaze Sesus humo mys-
 apyrētsa tsimoziknaha. Atahi tawahi koikny
 bakta tu. Deus bo mytsyhyryze mynapamykysoko
 iwatahi Deus bo mymyoktyhyryk hỹ. Ihumo
 mymytsumuēhĩkĩ iwatsahi mykurētsa hỹ.

²⁶ Atakta tsimytsumuēhĩrēta. Katsa mypuni-
 hikbyitsa tu batu sapy tsimaha. Sesus zikwy
 humo zuba mypunihikrētsa tsimoziknaha. Atahi
 tsimysapyrēta hỹ. Batu zimyi. Isapybara bo batu
 mytsaty ziky. Kytsa asaktsa hawa sisapybyitsa

mykaranaha ba mywa ziky my. Ata hi imys-
apyrēnikita bjoikpe bo nido. Deus tuk tasapy
anaeze mynapykyryk hỹ.

²⁷ Pibytuhukutu tapara ziknapamykyson-
ahatsa Deus wahoro zubata eze myraratsa ty
ziknasiwezokonahaze. Asahi:

— O Deus mysapybyitsatu tsikykaranaha ikia
myraratsa spu humo tymyokzohik. Atyryktsa sis-
apybyitsa tu nikaranaha humo kino niwatihi tys-
iokzohik — nikaranaha. Pororo ziknakaranaha.

Sesusta batu siwatsa my. Estuba zuba
Deus bo tanury tynyny niy. Mysapybyitsatu
tsikykaranaha anahumo hi nihyrikosokda,
ba zikyrikosokdazo abaka tawahi ispitu my.

²⁸ Tapara Moises bo nitsaso. Deus kytsa
nisihrinymyrykyze taparaktsa iwahoro zubata
eze ziknapamykysonahatsa nisiny. Asaktsa
sipunihikbyitsa tu zimyikinaha. Bykyze zuba
Deus tse babata ziwatawy. Bykyze itse babata pe:

— Ikia zuba kawahoro zubata eze
tynapamykysokota awahi tynapamykysokota.
Kahyrytsa tsyhyryze awahi tysitsumuēhĩkĩkta.
Ikia babata zuba batu zimyi — niy. Deus harere
wasani hỹ. Sesus hi mynamybetesawyky my,
tawahi mynapamykysokota my taharere tyhi
mynakara.

8

Sesus mytsyhyryze Deus bo mynapamykysoikik.

¹ Sesus Kiristu zuba tapara Deus wahoro
zubata eze mynapamykysokota ana hi
tsipahyrinymyry tsihikiknaha. Atahi
ipyrirykbyita tsimyharerewabyrēta hỹ. Atahi

Deus tuk bijoikpe bo nitsuk, anaeze Deus panuryk taba modyhyky.

² Asaktsa Deus wahoro zubata ziknapamykysonahatsa Deus pokpedawy bo ziknapupukunaha anaeze Deus bo ziknapamykysoikiknaha. Ityryktsa tsyhyryze Deus bo ziknapamykysoikiknaha. Sesusta meky wa tu my. Deus wahoro zubata ata hi kytsa nizuknikinaha anaeze Sesus batu mopykyryk, atahi Deus hudikhudikwy bo bijoikpe eze mynapykyryk. Anaeze hi isapy mozik, anaeze mytsyhyryze Deus bo mynapamykysoikik hỹ.

³ Asaktsa Deus wahoro zubata eze ziknapamykysonahatsaktsa tisapyrẽna ty Deus bo nyny ziknakaranaha. Deus hi nisiny iwatsahi kytsa tisapyrẽna ty Deus bo nyny ziknakaranaha, siraratsa humo kino niwatihi ziknasiwezokonaha. Iwaze siraratsa ty Deus bo nyny ziknakaranaha. Sesus mytsyhyryze mopamykysokota ustsã ziknapamykysokonahatsã watsã Sesus isapyrẽnikia ty Deus bo nyny niy. ⁴ Atakta mybarawy ezekta batu ziknapamykysokota my. Ustsã Deus wahoro zubata eze ziknapamykysonahatsaktsã asaktsã Moises harere humo zuba yhỹ nikaranaha iwatsahi kytsã tisapyrẽna ty Deus bo nyny ziknakaranaha.

⁵ Hawa ha ty bijoikpe eze tu wasani my. Wytyk ezeka hyrikoso zuba my. Deus parik Moises nizuknita atakta ihyrikoso zuba my, ihudikhudikwy baba hi bijoikpe eze tu anahi wasani my. Tubabatu Moises hara tykbaba

humo tabete niriktohokoze Deus taparik hyrikoso ziwatawy — Nawaty — niy. Deus ipe niy:

— Kaparik ty pykyhytu tyzukni! Kahyrikoso hi abo pawatawy — niy. Ziknapamykysonahatsaktsa kytsa bo nisitsumuëhîkîna Sesus bijoikpe eze tu mynamytsumuëhîkî. Atakta mytsumuëhîkîtsa.

⁶ Deus tatse zipehaze ihyriziktsokzawy tisapyrëna ipe niy. Asaktsa Deus wahoro zubata eze ziknapamykysonahatsa, Rewi tsekokatsa sihyriziktsokzawy tisapyrëna. Sesus Deus tse mysapuhyripyrywya ihyriziktsokzawy tisapyrëna hÿ. Tubabatu Deus Moises bo nitsasokoze iharere humo tisapyrëna. Deus hi:

— Aparakbaha mysisapywyky — niy. Iwaze ziknapamykysokonahatsa humo nawa ha ty nitaso astsatu nikara, iwa kytsa nisisapywyky. Sesus bo nitasoze iharere tisapyrëna, iharere mymysapywyky. Sesus humo mymysapywyky hÿ. Katsa anaharere bo hyÿ tsimykarannahaze ana humo hi myspirikporëtsa tsimoziknaha. Ihumo kino niwatihi mysapyrëtsa tsimoziknaha. Anaharere bo hyÿ tsimykarannahaze Deus tuk mywahi tsimynapykyryknaha iwatsahi mykurëtsa tsimoziknaha Sesus humo Deus mymysapywyky hÿ.

⁷ Tapara Deus Moises bo nipamykysoko. Anaharere tisapyrëna zeka usta harere ty batu tyso.

⁸ Moises harere humo myzubaha simysapybyitsa niyziknaha iwaze sisoho Deus harere papeu humo ziwatahaka:

— “Aba usta harere Isareu tyryktsa

Sudeutsa bo motsasoko
abaka kaharere humo sispirikporëtsa moziknaha.

- ⁹ Tubabatu taparaktsa ahadiritsa bo iktsasoko.
 Esito ekze ikxioktyhyryk.
 Kaharere sibo iktsasoikik.
 Kaharere humo batu hỹ zikaha.
 Iwatahi siharere bo kawabybarawa nazukniki” —
 Deus niy.
- ¹⁰ Deus hi:
 — Abaka usta harere Isareu itsekokatsa bo mot-
 saso,
 abaka kaharere sibo motsaso.
 Kaharere humo simysapyrẽtsa moziknaha.
 Kaharere bo mytsatyziu mynakaranaha,
 kaharere humo ba zikspiriktsokdanaha.
 Kaharere bo hỹ mykaranaha iwa mozihikik-
 naha.
 Asahi kape sisopyk:
 “O atazuba Deus my” maha.
 Utakta ispe kasopyk:
 “O asaktsa katyryktsa hỹ” — my.
- ¹¹ Nawatsatu kahumo tsipiknynaha.
 Iwatsahi situkytsa bo batu sihyrinymyry.
 Situkytsa pe — O Deus tsinynahaktsa! — iwa ba
 ziktsaso.
 Nawatsatu piknynaha iwatsahi isty peha
 peha byitahaktsa.
 Kytsa myhyrizikwanibyitsa, myhyrizikwanitsa,
 nawatsatu iwa piknynaha.
- ¹² Simysapybyitsa tu nikaranaha
 ana soho bo batu mytsatyzo my.
 Simysapybyitsa tu ziknakaranaha humo
 myspiriktsokdabaik.
 Simysapybyitsa tu nikaranaha mysiokzohik
 niy.

Iwa Deus harere papeu humo tatyryktsa soho botu ziwataha.

¹³ Tapara kyka mopykba. Ezytyk isapyzeken mozik iwaze ibykyka tsmoewynaha. Iwa Deus mype niy:

— Kaharere tapara tucky Moises bo iktsasoko ana bo ka mytsaty mytsaty byitaha! Abaka kaharere bo zuba hyŷ tahaktsa! Iwatsahi ahamysapyrëtsa tsmoziknaha — Deus niy.

9

Kiristu Deus hudikhudikwy bo nitsuk.

¹ Iwatsahi asaktsa Moises harere bo hyŷ nikaranaha Deus bo:

— O ikia zuba tsamysapyrëta — pororo ziknakaranaha. Iwa Deus parik eze ziknakaranaha. Ataparik kytsa nizuknikinaha.

² Taparaktsa tahararatsa hwyk ty iparik nizukninaha. Tsapukte buruk panu ty zipokpedawynaha. Nataba panu ipokpedawy eze:

— Deus imysapyrënikita sapy my — niaha. Anaeze rikatsasapy ouro ty, sidisahawyzozowy kino niwatihi atabete hi atsikara ty Deus bo zozo ziknakaranaha. Zikzibytuhukunaha zozozo ziknakaranaha. Iwa hŷ. ³ Iwaze usta taba ipokpedawy eze:

— Atakta imysapyrënikita babata sapy my — niaha. Anaka abazubaha niy.

⁴ Anaeze siraratsa wezowy ouro ty zoknihita. Ana bete iokmorënikia ty Deus bo zikziwezokonaha. Iwaze usta sinamysuk ouro ty zoknihita.

Tsiziurêta. Anaeze joporosuk tsibik ouro ty zokni-hita ty zik niaha. Mana zinaroko sidisahawy joporosuk eze pokpok niaha anaeze zik niaha. Iwaze taparakta Arõ zozowy ty bita niaha, tuba-batu izozowy humo tasakarebaik. Tapara ky Deus harere Moises bo nitsaso iwaze Moises iharere harahare humo ziwatahaka. Harahare petok aha humo ziwatahaka ana harahare humo petokuha sinamysuk eze zik niaha. Iwa. Sinamysuk eze zik niaha.

⁵ Sinamysuk bete sihyrikosotsa sisapyrêtsa. Bijoikpe iknyktsa hyrikosotsa. Sinamysuk tahasara harapu bete niapykyryk. Anaeze ziknampamykysokonahatsitsa simysapybyitsa nikaranaha, kytsa kino niwatihi simysapybyitsa nikaranaha, ana soho hi Deus bo nitsasokonaha:

— O Deus mysapybyitsa tsikykaranaha ana humo hi myraratsa tsiksibakanaha sispu bo iktsa tsimyze ana humo hi tymokzohik — nikaranaha. Iwaze Deus hi:

— Ahamysapybyitsatu tsikykaranaha ana soho humo hi takyriki ahararatsa ahasapyzeyky tsiksi-bakanahaze pahaokzohik — niy. Iwa tisapyrêna hỹ. Abaka ana soho ba pahahyrinymyry.

⁶ Iwaze Moises tukytsa ata parik nizuknibanaha iwaze asaktsa ziknapamykysonahatsaktsa ipokpedawy taba ziknapupuikiknaha. Anaeze tsizubarêna nikymynahaze Deus okzeka sihyriziktsokzawy ziknakaranaha.

⁷ Usta ipokpedawy tabaka taparaktsa zikna-pamykysonahatsa tuk estuba zuba ibo ziknat-sukuk. Ba zikzytyhykwa ziktsukuk. Iytyk tse-hewywa eze zuba ziknatsukuk. Zinatsukukze

myraratsa spu zuba zikorokonaha. Iwaze Deus pe niy:

— O Deus kararatsa kasapyzeken ibeze iwatahi kamysapybyita tu ikykara tsikokzo. O Deus myraratsa ahyrytsa sapyzeken tsiksibanaha iwatahi simysapybyitsa tu nikaranaha tysiokzohik. Abaka myhumu akyri byihuja — nikara.

⁸ Katsa mytsaty tsimykarannahaze anapokpedawy eze taparakta ziknapamykysonahatsakta tuk estuba zuba zuruze inatsuk, Deus hyrikoso ana soho nimyhyrinymyryky. Hawa kytsa Deus sapy bo ba zikpupunaha Deus hyrikoso nimyhyrinymyry. Iparik atatuze kytsa Deus bo bijoikpe eze ba zikpupunaha.

⁹ Ziknapamykysonahatsa Deus wahoro zubata eze tuze, sisapyrēnikitsa ty zuba Deus bo nyny nikaranaha. Siraratsa ty kytsa sapyzekenkytsa Deus bo nasiwezokonaha. Iwatsatu siraratsa ty nyny nikaranahaze kytsa hi:

— Katsakta batu mysapy tsimaha, mysapybyitsa tu tsimykarannaha — nikaranaha.

Hawa ha ty ziknakaranaha Deus parik eze nimyhyrinymyryky. Aba zuba Kiristu mozu-muze iwaze katsa Deus bo tsipomonaha. Ihumo mysapyrētsa tsimoziknaha. ¹⁰ Moises harere bo yhy nikaranaha. Wastuhu sidisahawy humo batu hauk niaha. Wastuhu siopuwy humo ba zikunaha. Sisopyk tyty tahakpikiknaha iwa ziknakaranaha. Sinury humo zuba siziurētsa nyzikiknaha, simyiwynahatsa nikaranaha, iwa

ziknakaranaha. Aibani Deus harere abaka nitasokoze hawa Kiristu humo zuba mysapyrëtsa tsimoziknaha ana harere hi taperyky.

¹¹ Iwatatu Kiristu izumu. Ata hi ziknapamykysonahatsa Deus wahoro zubata eze nisisapyzeyky atahi nimitysumuëhĩkĩ.

— Hawa ha ty isapyrënikia ty ahabo nyny my — mykara. Deus bo mytsyhyryze mynapamykysoko! Batu iparik eze tu my, ana hi kytsa nizuknikinaha. Atahi bijoikpe bo Deus tuk tasapy Deus baze niapykyryk anaeze Deus bo mytsyhyryze mynapamykysoko, ana hi tisapyrëna.

¹² Deus tuk tasapyze aparakbaha hi:

— Atazuba mysapyrënikia bo nitsuk. Estuba zuba nitsuk. Siraratsa spu ty batu wabehyryk niy. Hozipyrykza spu pikuzã spu iwa batu wabehyryk niy. Sispu ty Deus bo batu tywatawy ziknapamykysonahatsa Deus wahoro zubata siwatsa niy. Mysapyzeyky nihyrikosokda iwatahi tãspu tyty Deus bo zinyny. Ispu humo mysapyrëtsa tsimoziknaha iwatsahi mywahi Deus tuk tsimynapykyryknaha — nikaranaha.

¹³ Tapara kytsa simysapybyitsa ziknakaranaha, Moises mypehawy bo batu hỹ ziknakaranahaze simysapybyitsa ziknakaranaha. Iwatsahi ziknapamykysonahatsa Deus wahoro zubata eze siraratsa spu ty nisinyzokonaha. Sisopyk humo hozipyrykza spu, pikuzã spu, pikuzã tsibik ziwezokonaha izohyri ty iwa nisinyzokonaha. Iwaze Deus okze wasani niyziknaha.

¹⁴ Iwa maha zeka Kiristu spu humo mysapyrëtsa babatsa tsimoziknaha. Ihumo myspirikporëtsa. Kiristu batu ziky tsimysapyrëta zuba. Bazimyi.

Deus koikny baktatu ihyrikoso ituk mynapykyryk. Atatu nizihikik Deus bo itanyny niy, mysapyzekenihyrikosokdaze iwaze Deus bo atatu itanyny niy. Atahi:

— O kazo ziknapamykysokonahatsa awahoro zubata eze siraratsa nisiwezobanahaze kytsa simysapybyitsa nikaranaha ikia hi:

“O asaktsa wasani maha siraratsa kytsa sapyzekenisibanaha iwatahi wasani maha” tsiktsasoko. Abaka kaspu humo aparakbaha simysapyrëtsa babatsa moziknaha, sisapyzekenikyrikosokda iwatahi ikia ispe:

“O ahamysapyrëtsa babatsa tsimaha katsespu humo tsimy” — Kiristu niy.

Mysapyrëtsa tsimoziknaha iwatsahi mysapybyitsa tsikykaranaha mytsaty mytsaty byijataha. Hawa Deus koikny baktatu itsyhyryze tarabajaziu tsimykaranaha ana humo hi mytsaty tsimykaranaha.

Abaky Deus harere.

¹⁵ — Asaktsa Moises harere bo yhÿ nizihikiknaha tsahi tapara iharere bo batu hÿ ziknakaranaha iwatsahi zimyinahatsa tu nikaranaha. Kiristu simysapybyitsa nikaranaha humo nihyrikosokda. Abaka Sesus Kiristu hyrikosokdawy humo Deus simysapybyitsa nikaranaha mysiokzohik. Iwatahi Deus harere abaky mybarawy ezeaktsa bo niy. Ikiahatsa kawatawyhytsa tsimaha. Katuk ahawahi tsimynapykyknaha, Kiristu mytsapuhyripyrywyta ahasapyzekenihyrikosokda iwatsahi ahamysapyrëtsa babatsa

tsimoziknaha — niy. Iwa Deus Kiristu humo mymysapywyky.

¹⁶⁻¹⁷ Kyze aty my zeka:

— O uta mohyrikosokdaze kahyrikyky ty abo nyny my — my. Mohyrikosokdaze ihyrikyky ty usta bo nyny my za. Atatuze usta inamy batu ziaксе. Ispitu zeka usta namy ba ziaксе. Aty tsasoho tihi:

— Atakta nihyrikosokda — niy. Iwaze zuba kytsa piwabynahaze ihyrikyky ty usta piakse. ¹⁸ Taparaktsa mydiritsa siakbatsa siraratsa nisibanaha. Iwaze zuba Moises harere bo yh̄y nikaranaha. ¹⁹ Moises Deus harere aparakbaha bo nitsasoko iwaze pikuza tsibik zibeze hozipyrykza kino niwatihi zibeze sispu ty pihik ty tsakykyha niy. Joporosuk bo su niy. Iwaze iparikiha sazik ty isopo inarokoha nizokbatsi panu hozipyrykzazi nitsazikze isopo ity sok niyze izi tsitsairiharēna niyzik ispu humo. Kyze kytsa siharek bete su niy, ipapeu humo kino niwatihi siraratsa spu ty su niy. ²⁰ Kytsa bete, ipapeu humo kino niwatihi sispu ty su niyze ata hi:

— Deus harere mybo nitsaso iwatsahi ana harere bo yh̄y tsimahaktsa! Ana spu ahaharek bete su myze iwaze ikiahatsa Deus harere bo yh̄y tsimaha — niy.

²¹ Iwata Moises Deus parik bete siraratsa spu ty su niy. Iparik isapyrēnikia ty sibete niwatihi siraratsa spu ty susu nikara. ²² Asaktsa Moises harere bo yh̄y nizihikiknaha siraratsa ty ziknasibaikiknaha. Iwaze kytsa meky watu niyziknaha siraratsa spu humo. Deus anabo hi iktsa niyze bazik takyri kytsa simysapybyitsa nikaranaha

sispu humo nisiokzohik. Sinamy kino niwatihi siraratsa spu nisiharasusukuze tisapyrēna niyziknaha. Siraratsa sibaha byizeka batu sispu, iwaze Deus kytsa simysapybyitsa tu nikaranaha batu isty okzohik. Iwa hỹ.

Sesus Kiristu mysapyzekenihyrikosokda iwatahi Deus mysopyksapybyitsa tsimykaranaha mymyokzohik.

²³ Ziknapamykysonahatsa Deus wahoro zuba eze siraratsa ziknasibaikiknaha, aparakbaha sapyzekenihyrikosokda iwatahi Deus mysopyksapybyitsa tsimykaranaha mymyokzohik. Asakta bijoikpe bo Deus tuk tawahi mynapykyryknaha ispu meky watu maha. Katsakta Kiristu spu humo, mysapyrētsa tsimoziknaha, ana humo hi bijoikpe bo mywahi Deus tuk tsimynapykyryknaha. ²⁴ Iwatahi Kiristu Deus iparik bo batu paku. Anaeze ky bo kytsa suknihi bo ba ziktsuk. Iparik hyritywata bijoikpe eze tu, batu paku. Bijoikpe bo Deus tuk tasapy. Anaeze hi Deus bo mytsyhyryze mynapamykysoikik iwa mymytsumuēhĩkĩ.

²⁵ Iytyk tsehewa estuba zuba taparakta ziknapamykysonahatsa Deus wahoro zuba eze imysapyrēnikita babata sapy bo nitsuk. Nitsukze siraratsa spu zebykyrykze. Deus ana bo hi iktsa niyze aparakbaha simysapybyitsa nikaranaha nisiokzohik. Kiristu anabo batu paku atatu Deus bo itanyny mykara. Estuba zuba Deus tuk tasapy iwatahi ibo itanyny niy. ²⁶ Ziknapamykysokonahatsa wa horokba ziknakaranahatsa tu nihyrikosokdaikiknaha. Mybarawy nizuknize sinini mynakara batu iwa hỹ. Estuba zuba nihyrikosokda ba

zikyrikosokdazo. Mybarawy epykbyize Kiristu wytyk bo inasikze nihyrikosokda iwatahi izumu imysapybara zimoewyba.

²⁷ Nawatsatu tsimyhyrikosokdanahaze Deus metutu mymysapy.

— Ata hi my:

“Asaktsa wasani my. Utsa batu simysapy my” — my. Iwa myhuak ty mybo nyny my, asaktsa Sesus harere bo yh̄y ahabyitsaktsa sinini ykarawy bo mysipehahik. ²⁸ Kiristu niwatihi estuba zuba nihyrikosokda. Deus bo atatu itanyny niy. Taparakta Deus wahoro zubata eze siraratsa nisiba siwatsa Sesus mysapyzeken nihyrikosokda. Iwaze mysapybyitsa tsikykaranaha Deus pahaokzohik. Sesus botu nihyrikosokda mybarawy bo myziksizo. Myziksizoze batu mysapybara bo baziky, myziksizoze izikwy humo mysapyr̄etsa tsimoziknaha. Abaka atahi mytaperyky h̄y, ihumo mysapyr̄etsa tsimoziknaha.

10

¹ Kyze asaktsa Moises harere bo yh̄y nizihikiknahaze Deus harere tsikaeni zuba sihyrinomyry. Deus wahoro zubata eze taparakta tuk ziknapamykysonahatsa siraratsa nisibaikiknaha, iwatsahi pororo ziknakaranaha kytsa sityhyryze nisibakanaha iwatsa tu kytsa batu sispirikpo.

² Simysapyr̄etsa niyziknaha zeka batu tahapetu sisopyk:

— O katsaktsa batu myku imysapybara humo tsikykaranahatsa hi mysukatsihikr̄etsa tsimykaranaha — nikaranaha. Simysapyr̄etsa niyziknaha zeka siraratsa tyka beze beze byitaha.

³ Iytyk tsehewa tu siraratsa nisibakanaha pororo ziknakaranaha, tahamysapybyi humo nikaranaha iwatsahi siraratsa nisibanaha. Iwatsatu batu tyso:

— Abaka mysapyrētsa. Deus okzeka wasani tsimaha mysapybyitsa tsikykaranaha pahaokzohik — nawa batu tyso. Asahi:

— Katsa tsimyinahatsa. Hawa mysapybyitsa tsimykaranaha — nikaranaha. ⁴ Pikuza spu hozipyrykza spu kino niwatihi simysapybyitsa ziknakaranaha anahumo hi batu siokzo.

⁵ Iwatahi Kiristu izumu. Ziokpyryze Deus pe niy:

— O kazo mybarawy ezektsa siraratsa mysibanahaze akubyita tsimykara.

Mybarawy ezektsa tisapyrēnikia ty abo nyny mahaze akubyita tsimykara.

Kanury tsipikymyze kabo nyny tsimy iwatahi mybarawy ezekta mozik.

⁶ Mybarawy ezekta siraratsa mysibaze imysapybyitsa nikara

naha humo, akubyita tsimozik.

Aokze siraratsa nikorobanahaze simysapybyri humo akubyita tsimozik.

⁷ Iwatahi utakta: “O Kazo mybarawy bo mynasik iwatahi aharere bo zuba hȳ mynakara.

Iwa my. Hawa kasoho botu papeu humo ziwatahaka” — niy.

Iwa Kiristu tazo pe niy.

⁸ Tapara iwa niy:

— Mybarawy ezektsa siraratsa ziknasibakanahaze Deus iakubyita ziknakara. Tisapyrēnikia ty ibo nyny ziknakaranahaze iakubyita niyzik.

Deus okzeka siraratsa ziknasiwezobaiknahaze iakubyita ziknakara. Kytsa simysapybyitsa nikaranaha humo siraratsa nisibanahaze iwatsahi simysapybyitsa nikaranaha ana humo hi Deus nisiokzohik iwatatu iakubyita nikara — niy.

Iwa Sesus Deus soho niy. Tubabatu Moises taharere humo nisipehahik iwatatu Deus sisopyk humo iakubyita ziknakara. ⁹ Iwaze Kiristu hi:

— Uta wytyk bo mynasikze aharere bo zuba hyỹ mynakara iwaze kahumo akurēta tsimozik — niy.

Iwa myze mymywatawy abaka siraratsa wezo humo niwazuba mykara.

— Deus harere bo pykyhytu zuba hyỹ mynakara iharere bo zuba hyỹ mynakara iwaze siraratsa ty ka abaka beze beze byitaha tsimaha. Myzubaha sapyzekeny mohyrikosokda — niy. Iwatahi Deus mysapybyitsa tsikykaranaha mymyokzohik Kiristu mysapyzekeny nihyrikosokda.

¹⁰ Sesus Kiristu Deus nizihikik naha humo zuba hi hyỹ nikara iwa zikzuruku. Ikahaty zuba nihyrikosokda iwa Deus bo atatu itanyiny niy. Nihyrikosokdaze mysapybyitsa tsikykaranaha Deus ihumo mymyokzohik. Iwatsahi ihumo mysapyrētsa tsimoziknaha, ana hi Deus mybo piwatawy.

¹¹ Zikbyituhukutu Deus wahoro zubata eze ziknapamykysokonahatsa siraratsa ziknasiwezoikiknaha. Deus wahoro zubata eze ziknariktoriktohokonaha tahahyrikiztsokzawy humo zuba ziknakaranaha. Siraratsa nasiwezokonahaze kytsa simysapybyitsa nikaranaha batu isty okzohik. Deus siraratsa

koro bo iktsa nikaraze kytsa simysapybyitsa nikaranaha ana humo hi batu isty okzo.

¹² Sesus Kiristuta ikahaty zuba nihyrikosokda. Nihyrikosokdaze kytsa simysapybyitsa nikaranaha Deus Sesus humo nisiokzohik. Sesus Deus bo atatu itanyny niy. Deus baze ipanuryk taba mynadyhyky. Anaeze tawahi mynapykyryk.

¹³ Anaeze hi Sesus tasukyrytsitsa mysiperyky, iharere bo yhy mykaranaha, ana hi piperyky. Deus botu ipe niy:

— Uta kazikwy humo asukyrytsitsa aharere bo hyhy mykaranaha — niy. ¹⁴ Ikahaty zuba nihyrikosokda. Katsa mysapybyitsa tsikykaranaha ihumo nimyokzohik iwatahi nihyrikosokda. Ihumo mywahi mysapyrëtsa tsimoziknaha.

¹⁵ Deus hyrikoso ana ty hi nimyhyrinomyryky. Tapara Deus harere papeu humo ziwatahaka:

¹⁶ — Aibani uta katyryktsa kazikwy humo simysapyrëtsa moziknaha.

Abaka sibomotsasoze kaharere bo mytsaty tynakaranaha.

Abaka sakurëtsa kaharere bo mytsatyziu mynakaranaha.

Kaharere humo ba zikspiriktsokdanaha — niy.

¹⁷ Kyze Deus hyrikoso iwa ziwatahaka.

— Hawa ahamysapybyi tsikykaranaha ana bohi ba mytsaty ziky.

Hawa ahasopyksapybyri tsikykaranaha soho ba mytsaty ziky — Deus hyrikoso niy.

¹⁸ Mysapybyitsa tsikykaranaha Deus taokaniki abaka batu. Iwatsahi mysapybyitsa

tsikykaranaha humo siraratsa ba ziksiwezozonaha. Sesus Kiristu nihyrikosokdaze mysapyzekeniyzik iwatahi Deus mymyokzohik mysoho ty batu tywaby. Atahumo hi mysapyrētsa tsimoziknaha.

O kytsa Deus bo tsimahaktsa Sesus Kiristu humo.

¹⁹ Iwaze hi:

— O katukytsa mysapyrētsa tsimoziknaha. Mypunihikrētsa tsimoziknaha. Deus bo tsimypamykysokonahaze katsa ipokso batu mypyby tsimaha. Sesus Kiristu mysapyzekeniyrikosokda iwatsahi Deus imysapynikia bo tsimypupunaha. Hawa taparaktsa:

“Atakta imysapyrēnikta babata sapy bo” ziknapupukunaha siwatsa Deus bo tsimynapamykysokonaha. Batu ipokso mypyby — tsimaha.

²⁰ Taparakta ziknapamykysonahatsa tuk ana ipokpedawy panu ana bo hi pororo ziknakara iwaze Deus bo ziknapamykysoikik. Katsa Sesus mysapyzekeniyrikosokda naha humo Deus bo tsimypamykysokonaha. Nihyrikosokdaze ipokpedawy panu nisykbaik abaka Sesus humo Deus bo tsimaha. Atakta ispituzo iwatahi, iske ezytyk wa, atakta Deus ske tsimaha. Iwatsahi ibo tsimynapamykysokonaha hỹ.

²¹ Sesus mynapamykysokota my. Atahi abazubata my. Deus tyryktsa mysitsumuēhĩkĩ, ata kino mymytsumuēhĩkĩ hỹ. ²² Iwatsahi Deus bo tsimypamykysonahaktsa! Ihumo tsimyspirikpobabanahaktsa! Ba ahape tu ahasopyk:

— Tozeka ja kasapybyita mykara. Kamysapyrēta ja. Batu kanyhy — iwa batu tyso. Sesus humo mysapyrētsa hỹ. Hawa mymytsyhyrytsapik nahawa iwaze myziurētsa tsimoziknaha, iwatsa katsa ihumo mysapyrētsa tsimoziknaha. ²³ Hawa ha ty Deus motsasoko atsatu mykara. Katsa hi:

— Deus mymysapywyky ituk mywahi tsimynapykyryknaha — tsimaha. Batu tyso:

— Deus ja mymysapywy. Tozeka ja ituk mywahi tsimynapykyryknaha. Batu mynyhy — iwa batu tyso.

Deus harere bo zuba tsimykaranaha, iwatsahi iharere humo tsimyspirikpotohinahaktsa kytsa! Iharere tsiperynaha. ²⁴ Tyharape pokzitsikinahaktsa! Tyharape tsumuēhīnahaktsa! Hawa Deus humo mysapyrētsa tsimoziknaha iwatsahi ustsakyttsa tsysapywykynaha! Katsa sihumo mypokzitsirētsa iwatsahi tsysapywykynahaktsa.

²⁵ Tynakykpyknahaktsa kytsa! Wastuhu Sesus tuktsa zukbyitsahi tsiwabynaha. Ba siwa zikaha. Tynakykpyknahaktsa iwatsahi Deus harere ty tanymyryky. Tyharape hokusukninahaktsa! Mypehatsa atsoko myziksizo iwatsahi taperyky iwaze tynakykpyknahaktsa!

²⁶ Abaka Deus harere wasania ty tsiwabynaha. Ana harere bo hi hỹỹ tsimykaranaha tsa tu batu ma zikaha, iwaze Deus myhumo taokanizo. Iwatsahi katsa Deus pokso mypybyrētsa tsimozikzonaha. Iwaze batu mysapyzo, iwatatu Sesus mysapyzekenihyrikosokda iwatsahi batu myhuakak mysapybyi humo tsimynakaranaha.

²⁷ Hawa Deus mykara ana pokso hi mypybyrētsa. Katsa iharere bo hỹỹ aha byizeka sinini

tsimykaranaha. Iwaze Deus mymypehanaha tapyryky. Hawa mykpyri piwezona waha sinini tsimykaranaha. ²⁸ Tubabatu asaktsa Moises harere bo batu yh̄y niahaze ustsya kytssa nisibaiknaha. Kytssa petoktsa hawazeka harakykbyihitsa nitsasokonahaze:

— O atakta isapybyitatu nikara, Moises harere bo batu h̄y niy — nikaranaha. Kytssa atsatu nitsasokonaha zeka iwaze ata maḡu zibezenaha. Kytssa ihumo batu simypokzitsiu iwatsahi zibezenaha.

²⁹ Abaka kytssa siwatsa maha, asahi Deus tse humo batu siharereziu. Deus botu ispe:

— Ahamysapyr̄etsa tsimoziknaha. Katse ahasapyzekenihyrikosokda ahamysapybyitsa tsikykaranaha Sesus humo zahaokzohik iwatsahi ahamysapyr̄etsa tsimoziknaha — niy. Asaktsa katse harere bo batu h̄y niaha. Asahi:

— O Deus atse nihyrikosokda katsaktsa ihumo batu mospirikpo, iharere bo batu h̄y tsimaha — mykaranaha. Iwa niahaze Deus hyrikoso soho pisapybyikinaha. Ihyrikoso sihumo tsimypokzitsiukr̄eta my, asaktsa ihumo pisapybyikinaha. Iwatsahi sinini mykaranaha. Kytssa Moises harere bo batu h̄y nikaranaha sinini nikaranaha. Asa hi Deus hyrikoso zisapybyikinaha sinini mykaranaha h̄y. ³⁰ Hawa Deus tyryktsa tuk mykara iwa myhyrinymyr̄etsa. Deus harere papeu humo botu ziwatahaka:

— Tubabatu utakta katyryktsa mysitsapusare iky.

Abaka batu.

Asaktsa kaharere bo hȳy mykaranaha zeka, sisukyrytsitsa pokso mysibetesaka.

Asaktsa zisapywykynaha isapyrēnikia ty sibo nyny my.

Uta ispe my:

“Ikiahatsa tsisapywykynaha my”.

Utsa kaharere bo batu hỹ mynakaranaha.

Utakta ispe my: “Ikiahatsa batu mysapy tsikykaranaha” my.

Simysapybyitsa tuze sinini ykarawy bo mysipehahik — niy.

Iwa Deus harere papeu humo botu ziwatahaka.

³¹ Deus koikny baktatu tawahi mynapykyryk. Atakta myhumo takyriki zeka sinini tsimaha. Wasani tsimyzurukunaha zeka ihumo batu mpyby!

³² Hawa tsikykaranaha bo mytsaty tsimaha. Tapara Deus wasania ty tsiwabynahaze ana humo hi hyỹ tsikykaranaha. Deus hyrikoso ahatur niapykyryk. Asaktsa Sesus humo batu sispirikpo pahasininiwykynahaze tsihokdaharēna hỹ. Ikiahatsa ahakubyrisorokrētsa tsikyzyknaha.

³³ Utsa kytsa Sesus harere bo batu hỹ mykaranaha pahasapybyikinaha, myzubaha bo pahasapybyikinaha. Iwaze kytsa okzeka sihumo sinini tsikykaranaha. Kytsa sizubarētsa ana bo hi iktsa nikaranaha. Iwaze ikiahatsa kytsa tysitsumuēhīnaha asaktsa sinini mykaranaha tysitsumuēhīkīnaha. Tsimyhyrikosokdanaha zeka batu ahapyby.

³⁴ Ahaturkytsa Sesus humo sispirikpo ana humo hi sakyriukrēnikitsa hurukwy bo kytsa mysipeha iwatsahi tsiknasisukpararenaha sihumo ahamypokzitsirētsa iwatsahi sibo tsiknakozorenaha. Ahasukyrytsa ahanamy

ziaksenahaze ahakurētsa tsikyziknaha. Ikiahatsa tihi:

— Deus mymysapywyky isapyrēnikia ty mybo nyny my, bijoikpe eze ituk tsimynapykyryknaha mywahi ituk tsimynapykyryknaha. Ana hi tisapyrēna hỹ. Mynamy aiba tohi zuba myworoba Deus mybo nyny mahaka ana ka batu hawa tohi ziky tawahi mynapykyryk — tsimaha.

³⁵ Iwatsahi ahapunihikrētsaktsa kytsa! Ahapunihikrētsa tu zeka Deus tisapyrēnaha ty ahabo nyny my. ³⁶ Hawa ha ty Deus mozihihikik pykyhytu tahaktsa! Ahakubyrisorokoktsa! Iharere bo hyỹ tsimaha zeka ahapunihikrētsa tsimoziknaha. Iwaze Deus isapyrēnikia ty botu ahabo nitsasoko anatyhi ahabo nyny my. ³⁷ Deus harere papeu humo:

— Aibani zuba atakta myziksizo.

Iokboha zuba pykaremyny.

³⁸ Kahyrytsa kahumo mospirikpotohinaha iwatsahi katuk tahawahi mynapykyryknaha.

Kahumo sispirikpo byizeka sihumo batu kaku — Deus niy.

Nawa Deus harere papeu humo ziwatahaka.

³⁹ Katsa Deus humo myspirikporētsa. Batu aty tohi mysoho tihi:

— O asaktsa Deus humo batu sispirikpo iwatsahi sinini ykarawy bo mykaranaha — iwa batu aty tohi mysoho ba ziktsaso. Katsa Deus humo myspirikporētsa iwatsahi ituk mywahi tsimynapykyryknaha. Mysapyrētsa tsimoziknaha. Iwa hỹ.

11

Taparaktsa Deus humo sispirikporētsa nikaranahaze hawa nikaranaha.

¹ Kyze Deus harere bo hyĩ tsimykarana ha iwata-sahi ihumo myspirikporētsa iwaze hawa ha ty taperykynaha atsatu mybo nyny my. Ihumo myspirikporētsa mypetu mysopyk:

— Hawa ha ty Deus bo tsikzapykykynaha anatyhi mybo nyny my — tsimaha. ² Tubabatu taparaktsa Deus harere bo hyĩ ziknakaranaha ihumo sispirikporētsa. Iwatahi Deus sisoho ziknatsasoko:

— O asaktsa kaokzeka simysapyrētsa — niy.

³ Deus harere bo hyĩ tsimykarana ha zeka taharere eze mybarawy nizukni, ana hi myhyrinyrētsa. Aba ibo iktsa tsimykarana ha nizukni. Zinyahabara humo kino nizukni. Taparaka batu tsarawyky iwaze hi tsizubarēna nizukni.

⁴ Aba Abeu soho bo mytsaty my, atakta Deus harere bo hyĩ ziknakara ihumo tispirikporēta hỹ. Atahi Deus isapyha ty Deus bo nyny niy. Iziky kino niwatihi isapyha ty Deus bo nyny niy. Abeu Deus bo nyny niy wasani niy. Atahi Deus humo tispirikporēta hỹ iwatahi Deus ipe niy:

— İkia kaokzeka wasani tsimy — niy. Iziky bo batu tyso. Atakta Deus humo batu ispirikpo iwatahi isapybara ty ty nikara. Abeu nihyrikosokda. Tubabatu nihyrikosokda iwatahi iharere humo batu myspiriktsokdahu, Deus humo ispirikpota babata niy.

⁵ Aba Enoke soho bo mytsaty my, atakta Deus harere bo hyĩ ziknakara ihumo tispirikporēta hỹ.

Iokzahabyitatu Deus bo nido, Deus zikwy humo hi nido. Itukytsa batu ity nyzo niaha, Deus bo botu nido. Tapara idobyize Deus isoho tihi:

— O ata humo kakurēta — niy. ⁶ Katsa Deus harere bo batu hỹ tsimykaranaha, iharere humo mospirikpo byizeka myhumo batu iaku. Katsa ibo tsimypamykysonahaze mypetu mysopyk:

— O Deus koikny baktatu my, myhumo tsimypokzitsirētsa mymysapywyky hỹ ana humo hi myhyrinymyrētsa — tsimaha. Iwaze myhumo tsakurēta my.

⁷ Aba Noe soho bo mytsaty my Deus tihi:

— Mybarawy ezektsa pihik humo mysiharazuzukbaik iwaze mysiakbabawyhik — niy. Ana soho ziwaby Noe hyỹ niy. Hyritsik batu inyhy iwatatu Deus harere bo yhỹ niy. Tsaraha puētsikbyita nizukniki iwaze ioke ihyrytsa ahatsa sirehetsa moziknaha. Noe taoke zuba, tahyrytsa tuk Deus harere bo hyỹ nikaraze ustsya kytsa iharere bo batu hỹ ziknakaranaha ziwatawyky. Iwatahi Deus hi:

— O ikia kaokzeka wasani tsimy — niy.

⁸ Aba Abarão soho bo mytsaty my. Deus ipe niyze:

— Nabo meky botu tsikasapykta! Nabokta! — niy. Hyỹ niy. Inyhybyita tu mekybotu Deus harere humo niukuru, iwatahi ihumo tispirikporēta niukuru. ⁹ Kyze anabo zumu. Ana soho Deus tihi:

— Naka asapy mozik — niy. Ana bo zumuze isukmota wata niukuru. Batu wahoroko niy. Siraratsa hwyk iparik niy, tatse Isake tuk

niapykyryk, itsekoka Sako kino niwatihi iparik eze niapykyryknaha. Deus ispe niwatihi:

— Naka ahasapy mozik — niy. Deus harere bo hyỹ nikaranaha ihumo sispirikporëtsa iwatsahi iparik eze niapykyryknaha. ¹⁰ Abarão ihudikhudikwy eze ziperyky, anaeze hi Deus mozukni anaeze hi tisapyrëna ana kino ziperyky. Anaka ba zikokda.

¹¹ Aba Sara soho bo mytsaty my. Deus ipe niy:

— Tsiktsaikbatatsa tu tsipabykyhy — niy. Deus harere bo hyỹ ihumo tispirikporëtatsa iwatsahi tabykyhy. ¹² Ibarikta Abarão nitsaikbata Deus harere humo ioke tabykyhy. Itsekokatsa sizubarëtsa niyziknaha. Hawaze itsekokatsa my. Batu aty tohi ihyrinomyry, byrisoiktsa watsa, batu myhyrinomyry, nimyra hyritywaha niwatihi tsizubarëna hiba, ba ziksiwatawynaha.

¹³ Deus humo sispirikporëtsa Abarão, Isake, Sako ahatsa iwa Deus humo sispirikporëtsa baba. Deus botu ispe niy:

— Anaka ahasapy mozik — niy. Iwatsahi ana soho hi taperyky. Tahatuktu sisopyk:

— Deus harere humo naka mysapy mozik mykaranaha. Mytsekokatsa naka sisapy mozik iharere humo hỹ — nikaranaha. Iwa Deus harere bo hyỹ nikaranaha ihumo nispirikpokonaha iwatsahi sakurëtsa niyziknaha. Deus harere nitsasokoze atsatu mykara ana humo hi sihyrinomyrëtsa iwatsahi sakurëtsa moziknaha.

— O katsaktsa mybarawy eze tsimypykyryknaha tuze mysukmotsa tsimaha. Kasapy bo tsipiharamunaha zuba — niaha. Nihyrikosokdana-haze ana humo hi batu sisukmo iwatsa tu Deus

harere humo sakurētsa. ¹⁴ Asaktsa motsasoikik-naha:

— O kahudikhudikwy tsipiharamunaha zuba
— mykaranaha usa hudikhudikwy taberiki.
¹⁵ Tahasapy ekze inaonaha tsa hi batu mytsaty zikaha. Tahasapy bo mytsaty mykaranaha zeka iwaze zikzisionaha. Batu ihokdaha. ¹⁶ Asaktsa usa hudikhudikwy taberiki, ana bo hi mytsaty nikaranaha. Anahudikhudikwy bijoikpe bo tisapyrēna. Deus hi anahudikhudikwy sibo nyny my. Deus sihumo batu sikpyby. Ipe nikaranahaze:

— Katsaktsa Deus hyrytsa tsimaha, ihumo myspirikporētsa — nikaranaha. Deus ana harere bo yh̃ ny.

¹⁷⁻¹⁸ Aba Abarão soho bo puētsik mytsaty my. Abarão tatse ty Deus bo nyny ny. Deus botu ipe ny:

— Atse mopurukze ihumo atsekokatsa sizubarētsa maha — ny. Yh̃ nikara iwatahi ana harere humo hi itse nipuruk. Kyze Deus Abarão niyze hawa kahumo iakparawy babata pinymyry tsihikikze, iwatahi atakta kaharere bo ma my zeka pinymyry tsihikik. Iwaze Deus ipe ny:

— Atse ikahatahi tsibezehikta! — ny. Iwa niyze — Atakta kahumo tsimypokzitsiarēta babata — mytsaty nikara. Iwaha humo Abarão ihumo iakparawy pihyrinymyryky. Deus ipe niyze:

— Atse ikahatahi tsibezeakta, Abarão iharere bo hỹ ny. ¹⁹ Tatse asiba zibeze tatuktu isopyk:

“O Deus katse Isake mynahyryzikpowy” — niy. Abarão Deus harere bo hyĩ niy ihumo tispirikporēta babata my, ana bo Deus nikozoze ipe niy:

— Niwazubakta! — niy. Iwaze Abarão tatse tawahoro bo zisihyrykzo. Atahi inahyryzikpo tawata niy. Iwa Abarão tatse Deus bo nyny niy, hawa ihumo tispirikporēta babata ziwatawy.

²⁰ Aba Isake soho bo mytsaty my. Atakta Deus harere bo hyĩ nikara ihumo tispirikporēta iwaze tahyrytsa pe:

— Deus pahasapywyky, bykyzehu isapyrēnikia ty ahabo nyny my — niy. Iwa ihyrytsa Sako Esau ahatsa bo nikara.

²¹ Aba Sako soho bo mytsaty my. Atakta Deus humo tispirikporēta zumuzakaze Deus pe niy:

— O ikia zuba amysapyrēnikita ahumo kakurēta hỹ — niy. Nitsaikbata tu tazowowy humo tatyhuziwy niy. Sako tatsekokatsa pe:

— O Deus isapyrēnikia ty ahabo nyny my — niy. Iwa Sose hyrytsa pe niy.

²² Aba Sose soho bo mytsaty my. Atakta Deus harere bo hyĩ nikara ihumo tispirikporēta nikara zumuzakaze tatukytsa pe:

— Isareu tsekokatsa Esito ekze tsinaonahaze, kapoiktsa tysizozikyknaha nabo kahudikhudikwy bo tu tysiityknaha — niy.

²³ Aba Moiseszo soho bo mytsaty my. Asaktsa Deus harere bo hyĩ ziknakaranaha ihumo sispirikporētsa iwatsahi tahatse ziokpitsihiknaha. Esito ezektsa pehakatsa tihi:

— Sudeutsa makuskyrytsa mopuruknahaze tysibanaha! — niy. Iwatatu Moises zo ihumo batu

pyby. Itse tsiziurēta iwatsahi byzoje harakykbyihi zirahaze tabykyhy ziokpitsĩnaha.

²⁴ Aba Moises soho bo mytsaty my. Atakta Deus harere bo hyĩ ziknakara ihumo tispirikporēta. Esito ezektsa ipe sisopyk:

— Abazubata ste tatse tu tsimy — nikaranaha. Taypykze ana harere batu iakparawy. Deus harere bo hyĩ nikaraze itukytsa bo iakparawy.

²⁵ Situk sinini ziknakara. Imysapybara tu batu hĩ nikara, batu tabo zuba ziknakara. Deus bo zuba ziknakara iwatahi tatukytsa tuk sinini ziknakara.

²⁶ Batu tapetu isopyk:

— O Esito eze tu mynapykyryk zeka kanamy tsizubarēna hĩ my — iwa batu tyso. Deus tyryktsa nisitsumuēhĩ tsihikik hĩ. Iwatahi tatukytsa harere bo batu hĩ nikaranahaze Kiristu wata niyzik. Kytsa iharere bo kino niwatihi batu hĩ nikaranaha, Deus tyryktsa nisitsumuēhĩkĩ zeka tsakurēta hĩ niy. Inamy tsizubarēna humo tsikaeni zuba iakparawy. Iwatahi Deus ziperyky:

— O atahi isapyrēnikia ty kabo nyny my — ana humo kino tsihyrinymyrēta niy.

²⁷ Deus harere bo hyĩ nikara ihumo tispirikporēta tu Esito ekze niparak. Ispehatsa kyriwy humo batu ipyby. Deus harere bo zuba hyĩ nikara ihumo tispirikporēta tsakurēta. Deus bo mytsaty ziknakara nawa zikzuruku iwatatu Deus bo batu iktsa niy, isoho humo mytsaty ziknakara.

²⁸ Moises Deus harere humo hyĩ nikara ihumo tispirikporēta iwaze Isareu tsekokatsa pe:

— Bijoikpe iknykta Esito ezektsa hyrytsa taparaktsa mysiba. Iwatsahi hozipyrykzatsa spu ty ahahokbowytsa bo susu taha. Iwaze bijoikpe

iknyktsa iharapu taba my ahahyrytsa taparaktsa batu mysiba ahahyrytsa mysiharamu zuba. Hozipyrykzatsa spu bo iktsa niyze ahahyrytsa ba ziksiba — niy.

Kyze hawa Deus sihumo tsimypokzitsiukrēta mytsaty ziknakaranaha tahamyikaha bo pororo ziknakaranaha Paškoia inarokoha bo. ²⁹ Isareu tsekokatsa kino niwatihi Deus harere bo hyỹ ziknakaranaha ihumo sispirikporētsa. Iwatsahi buburu zuba zitsikzanaha, siekze pihik nitsehespyk. Buburu zuba Pihik Tsikyryri inarokoha niy. Bykyze Esito ezektsa atsatu koikny zitsikzakana-hatsa tu pihik nisiharapusu. Batu aty tohi arehabyitsa.

³⁰ Aba Isareu tsekokatsa soho bo mytsaty my. Asaktsa Deus harere bo hyỹ ziknakaranaha ihumo sispirikporētsa niaha. Sipehatsa Sosue tuk Deus humo sispirikporētsa hỹ. Serikoho okpedawy haraharetsa ty iokarawyhyta iwatsahi sisukyrytsitsa ba ziknapupunaha, anahi inakarabaik. Nawa puruze usta tsyhyry humo petok, Serikoho petaba nikarikinahaze atsoko haraharetsa naktsaktsakbaiknaha.

³¹ Aba Rahabe soho bo mytsaty my. Atatsa Serikoho ezektatsa niy. Tapara kytsa hapik paikpa ziknaparakatatsa. Aiba eze atatsa Deus harere bo hyỹ ziknakara ihumo tispirikporētatsa. Sosue kytsa Serikoho hudikhudikwy bo nisipehaze iwa nizokparakanaha, asahi sodadutsa pokso niwakiknaha. Iwaze atatsa wahoro bo izumunahaze atatsa ispe niy:

— Pakutaha. Ikza pahaokpitsihihik, bykyze kytsa pahaberinahaze ba zahapetumunaha —

niy. Bykyzehu Serikoho hudikhudikwy ezektsa Deus harere bo batu hỹ zikaha, iwatsahi kytsa nisibanahaze Rahabe batu. Atatsa itukytsa batu isty ba. Atatsa Deus harere bo hyỹ nikara ihumo tispirikporētatsa tu nitare.

³² Aba ustsas kytsa Deus harere bo hyỹ ziknakaranaha ihumo sispirikporētsa ahabo batu motsaso, Kideō, Barak, Sasō, Sepata, Dawi, Samue, ustsas Deus sohokotsa iwatsa sisoho batu motsaso, sisoho piwataha zeka ba zikpyk.

³³ Asaktsa Deus harere bo hyỹ ziknakaranaha ihumo sispirikporētsa hỹ. Ustsas tyryktsa bo niwatsorokonahaze sisapy ziaksenaha iwatsahi niwakiknaha. Deus okzeka zisapywykynaha iwatahi isapyrēnikia ty sibo nyny niy. Wastuhu kytsa Deus humo sispirikporētsa iwatsahi ustsas kytsa parinitas bo nisihorokiknaha, iwatsatu parinitas humo batu siborohuk iwa Deus harere bo hyỹ ziknakaranaha ihumo sispirikporētsa ziwatawykynaha.

³⁴ Wastuhu kytsa Deus humo sispirikporētsa iwatsahi ustsas kytsa izo zuba bo nisioktsokiknaha, iwatsatuze izo humo ba zikarakoronaha iwa Deus harere bo hyỹ ziknakaranaha ihumo sispirikporētsa ziwatawykynaha. Ustsas kytsa asiba nisibanaha sokorotsapuzezety asaktsa niwakiknaha, Deus sihumo tsimypokzitsiukrēta iwatsahi niwakiknaha. Ustsas kytsa siakubyitsa tu sipunihikrētsa niyziknaha. Ustsas bipyritsas bo niwatsorokonahaze sipunihikrētsa niyziknaha. Iwatsahi bipyritsas sipokso niwakbaiknahaze nanabyitaba nitururuknaha. Iwa ziknakaranaha

Deus harere bo hyŷ ziknakaranaha ihumo sispirikporētsa.

³⁵ Aba wutykyryk soho bo mytsaty my. Asiza hi Deus harere bo ziknakaranaha ihumo sispirikporēza iwazahi sihyrytsa botu niakbanahatsa tu Deus nasihyrizikpowy tahajeza bo tu ziksizonaha.

Usiza sakyriukrēnikitsa nisimyitsapyriwykynahaze sinini nikaranahatsa nihyrikosokdanaha humo. Sakyriukrēnikitsa ispe:

— Deus harere bo yhyŷ ahabyi zeka ihumo ahaspirikpobyihu ja iwatsahi ba zikamyitsapyrizonaha — niaha. Anahi batu siwabytoktoho. Myhyrikosokdanaha humo batu sipyby. Asiza tihi:

— Batu. Tsimyhyrikosokdanaha zeka, bykyzehu Deus mymyhyrizikpowyzo, iwaze mywahi ituk tsimynapykyryknaha hŷ — iwa mytsaty ziknakaranaha. Iwaze kytsa nisibanaha.

³⁶ Utsa kytsa Deus harere bo hyŷ ziknakaranaha ihumo sispirikporētsa iwatsahi kytsa ziknasiapikiknaha. Nisisapybyikinaha. Nisikikinaha, myraratsa hwyk tsazikihi ty nisikikinaha. Karikutsitsiwytza ty nisitsipatsawarakanaha, iwaze sakyriukrēnikitsa hurukwy bo nisihuruknaha. Asaktsa Deus harere bo hyŷ ziknakaranaha ihumo sispirikporētsa tu kytsa nisimyiijaikiknaha nisisininiwykynaha.

³⁷⁻³⁸ Utsa kytsa Deus harere bo hyŷ ziknakaranaha ihumo sispirikporētsa sisukyrytsitsa haraharetsa nisipaparakanaha iwa nisibakanaha. Utsa kytsa Deus harere bo hyŷ ziknakaranaha ihumo sispirikporētsa sisukyrytsitsa tsapukte buruk bokokik niaha iwa nisibanaha. Sokorotsapuzeze ty nisibakanaha.

Ustsa kytsa Deus harere bo hyĩ ziknakaranaha ihumo sispirikporẽtsa tahasukyritsitsa pokso niwakiknaha batu sisuku. Tahasuk ty myraratsa hwyk ty ziwowokonaha, hozipyrykza hwyk hi kaberito hwyk hi kino niwatihi tahasuk ty niaha. Jerukbara tahasapy niaha. Hara jobonita bo zukzuk niaha batu wahoroko. Harahare hoke bo tahokpitsĩkĩnaha, wytyk hoke eze niwatihi tahokpitsĩkĩnaha. Batu sidisahawyky taharapa zikziykikiknaha. Kytsa simyijaikiknahatsa ziknasiapikiknaha. Kytsa sisoho:

— O asaktsa sakmyitsakohok ziknakaranaha. Kytsa okzeka sakmyitsakoho niaha. Deus okzeka simysapyrẽtsa hĩ, mybarawy ezektsa batu sapy mykaranaha iwatsahi katyryktsa humo sisikpy-byrẽtsa — Deus niy.

³⁹ Asaktsa Deus harere bo hyĩ ziknakaranaha ihumo sispirikporẽtsa babatsa. Deus sisoho hi:

— O ikiahatsa tsahamysapyrẽtsa tsimaha — niy. Simysapyrẽtsa mybarawy eze zikzurukunaha. Deus isapyrẽnikia ty sibo nyny ahaziwazy niy. Iwatsa tu nihyrikosokdanaha. ⁴⁰ Deus aparakbaha nisisapywytsihikik. Iwatahi ziperyky mybo mytsaty nikara. Abaka asahi iharere bo hyĩ mynakaranaha ihumo sispirikporẽtsa myzubarẽtsa mymysapywyky. Ihumo mysapyrẽtsa tsimoziknaha. Iwatahi katsaktsa Deus zikwy humo mysapyrẽtsa tsimoziknaha, ustsa kytsa taparaktsa kino niwatihi ihumo sispirikporẽtsa simysapyrẽtsa moziknaha. Myzubarẽtsa Sesus watsa tsimoziknaha ihumo mysapyrẽtsa babatsa tsimoziknaha. Iwa hĩ.

12

Deus myzo.

¹ Kyze asaktsa taparaktsa sizubarētsa Deus harere bo ziknakaranaha ihumo sispirikporētsa. Hawa haeze zikzurukunaha tsiwabynaha ana humo hi katsa hi:

— O Sesus harere humo pykyhytutaha hỹ tahaktsa. Hawa mymysapybyitsa tsikykaranaha tsimoewynahaktsa — tsimaha.

Atakta moparakze tapara pomo tsihikik amy titsakyrīkrēna zikatsimoewy. Iakubyri mozumu zeka iwatatu ba pyk ziky. Katsa mysapybyitsa tsikykaranaha iwa tsimoewynahaktsa! Nanabyi soho bo ka mytsaty mytsaty byitaha! Katsaktsa tsipimyikinaha iwatsahi Sesus harere humo hỹ tahaktsa! Tapara zumu tawa tsimoziknaha. Iwaze Deus humo myspirikporētsa tsimoziknaha.

² Sesus bo mytsatzyiutahaktsa! Ihumo Deus harere bo hỹ tynakaranahaktsa! Atahi Deus humo tispirikporēta h̃y. Deus harere bo hỹ ziknakara. Iwata tsimoziknahaktsa! Atakta nihyrikosokdaze tatuktu isopyk:

— Bykyzehu kazo tuk kakurēta mozik. Asaktsa zikmyijakanaha iwatatu sisapyzesty iharapatawyhyta humo myhyrikosokda. Kytsa hi:

“O kytsa iharapatawyhyta humo mohyrikosokda zeka sisikpybyrētsa maha.” Siwa ba mytsaty ziky batu kasikpyby. Deus harere bo hỹ ikykara iwatahi ituk kawahi mopykyrykze kakurēta h̃y ana soho bo mytsaty mynakara. Iwaze tsihokdaharēna Deus humo kamypokzitsiarēta iwatatu mohyrikosokda —

niy. Abaka Deus panuryk taba modyhyky. Deus tuk ityryktsa mysipeha.

³ Hawa Sesus sinini ziknakara naha bo mytsaty tahaktsa! Sakyriukanikitsa ihumo batu siakparawy. Asaktsa Deus harere bo batu hỹ zikaha sispirikpobyitsa tu iwatsahi ziaknikinaha. Atahi tsipunihikrēta hỹ. Iwata bo hi mytsaty tahaktsa! Iwaze iwata ahapunihikrētsa tsimoziknaha. Ihumo tsimyspirikpotohinaha.

⁴ Simysapybyitsa mymypeha tsihikiknaha. Deus wasania ty sibo tsiktsasonahaze ana humo hi zahamyijakanaha. Asahi pahabanahatsa ziwazy. Sesus wata batu sinini tsimykaranaha.

⁵ Deus harere bo mytsatzyiutahaktsa! Iharere papeu humo botu ziwatahaka iwa niy. Deus tahyrytsa humo nawa isopyk iwatahi botu ziwatahaka:

— Kahyrytsa pahasininiwyky zeka tsiwabytoktonahaktsa!

Ikiahatsa sinini tsimykaranaha ana humo hi tsinymyrykynaha.

Utakta pahapehahikze tubyizuba taha!

⁶ Mypehatsa myhumo tsimypokzitsiukrēta iwatahi mymysininiwyky iwaze mysapyrētsa tsimoziknaha.

Kahyrytsa spirikpowy bete mysipehako iwaze wasani mykaranaha iwa kaharere bo piwabytoktokonaha — niy.

Iwa Deus harere papeu humo niy. Ana humo hi ahaspiriktsokda byihuja!

⁷ Iwaze sinini tsimykaranahaze ahakubyrisoroktsaktsa! Sinini tsimahaze ahatuktu tsimaha:

— O myzo bijoikpe eze tu mysapyrëtsa tsimoziknaha iwahi mozihihikik, iwatahi pahasininiwyky — tsimaha. Katsa myhyrytsa pimyinahaze mytaharapehanaha, Deus mykara nawatihi.

⁸ Aty itse isopyksapybyita tuze ipe ahabyizeka:

— Atakta isopyksapybyita atsebyitatu my — tsimaha. Deus kino niwatihi tahyrytsa mysipehaka iwatsahi simysapyrëtsa moziknaha. Ispehahuk byizeka batu ihyrytsa babatsa zikyzyknaha. ⁹ Mypykbyize myzotsa harere bo yhỹ tsikykaranaha. Ziknamypehakanahaze siharere bo yhỹ ziknakaranaha. Asahi kytsa zuba iwatsa tu siharere bo yhỹ tsikykaranaha. Deus hi bijoikpe eze tuze ihyrikoso my, ata harere humo pykyhytu hỹ tahaktsa! Iwatahi ata mymypehaze iharere humo atsoko hỹ tsimykaranaha, iwa ituk mywahi tsimynapykyryknaha.

¹⁰ Myzotsa ziknamypehakanahaze mysapyrëtsa tsikyzyknaha. Sisopyk humo wasani tsikaha, ana hi nizihikiknaha. Deusta tsihyrynymyrëta iwatahi iharere wasani nikara, iwa mysapyrëtsa babatsa tsimoziknaha ana humo hi mozihihikik, Sesus wa tsimoziknaha ana hi mozihihikik. ¹¹ Deus mymypehaze mysukatsihikrëtsa tsimoziknaha. Sinini tsimykaranahaze batu myku. Bykyzehu mykurëtsa tsimozikzonaha. Mydikrëtsa Deus harere humo hỹ tsimykaranaha, iwatsahi mysapyrëtsa tsimoziknaha h̃y. Mysapyrëtsa tu Deus harere humo hỹ tsimykaranaha iwatsahi mykurëtsa h̃y.

Deus harere bo zuba hỹ tsimykaranaha.

¹² Iwatsahi ahabo ka mytsaty mytsaty byitahaktsa! Sisukatsihikrëtsa tysitsumuëhĩnahaktsa! Asahi tsikaeni zuba Deus harere humo hyĩ mynakaranaha. Iwaze ahahumo sispirikporëtsa moziknaha. ¹³ Wasani haty zuba ikiahatsa mytsatyiutahaktsa! Iwatsahi sisopyksapybyitsa tu simysapyrëtsa moziknaha.

¹⁴ Ahaõtutsa pauksitsa bo tysisapywykynahatsa kytsa! Harape tybetsak betsak byitaha! Mysapyrëtsa babatsa tsimoziknaha. Mymysapybyitsa tu tsimykaranaha zeka mypehatsa Sesus ba zinyaha. ¹⁵ Deus myhumo tsimypokzitsiukrëta, myzibiyituhukutu myhumo tsimypokzitsiukrëta iwatsahi tyharape tsumuëhĩnahaktsa kytsa! Deus harere humo hyĩ tsimykaranaha iwa tyharape tsumuëhĩkĩnaha. Wiharata iskpita wata anahi imyrawywy wata ahabyitaha. Wiharata myrawy batu sapy my. Aty Deus harere bo batu hĩ ahabyi zeka itukytsa kino niwatihi Deus harere bo batu hĩ zikaha. Atakta batu imysapy my. Wiharata iskpita wata. Iwatsahi pykyhytutaha kytsa! Ahatukytsa tysitsumuëhĩkĩknahaktsa! Iwaze kytsa ahaharere humo ba zikmyinaha.

¹⁶ Asahi mekta oke tu pipyrirykyze tysitsumuëhĩnahaktsa! Kytsa Deus harere bo zuba hyĩ mykaranaha tyharape pokzitsinahaktsa! Esau wata ba zikaha. Atahi Deus harere bo batu hĩ nikara. Atahi taparakta taypykta myhyrizikwani. Tabo zuba mytsaty ziknakara. Tsaraparëta niyze tatsy pe niy:

— O katsy adisahawy ty kabo nynytykta. Uta tapara ikypykta hi myzo mohyrikosokdaze ihyrikyky kanamy mozik! Abaka adisahawy

ty kabo nyny tsimy zeka ikia taypykta wata tsimozik, myzo mohyrikosokdaze ihyrikyky anamy mozik. Ikia kasapyzeky tsimozik iwatahi Deus pasapywyky. Iwa tsimyzeka adisahawy huak zuba — niy. Deus harere humo batu hỹ niy, iwatahi tadisahawy bo zuba mytsaty nikara. Iwabyitaha. ¹⁷ Aibani zuba Esau myhyrizikwanita niyzik tsihikik. Izo itsyhyryze Deus bo nipamykyso tsihikik ba hawa tohi zikaha. Itse iykpykbita tsyhyryze botu Deus bo nipamykyso. Iwa hỹ. Tapara taypykta tisukatsihikrēta nikara. Nipuziuku. Deus pisapywyky ana hi nizihikik. Hawa niy ahahtyrynyrētsa iwatsahi iwata byitaha!

¹⁸ Kyze taparaktsa myzotsa hara jobonikita bo zumukunaha hara inarokoha Sinija. Zumu-nahaze izo zuba. Bijoikpe satata nioktsirōrō miwa niyzik. Zopoktsa inabybyknaha. Ana pokso sipybyrētsa. Ana kino nimypybytykynaha. ¹⁹ Sibekeresuka hyritywa ziwabynaha. Deus yk-soho ziwabynahaze sipybyrētsa nikaranaha:

— O niwazubaktsa! katsa mypybyrētsa — ni-aha. ²⁰ Moises tihi:

— Hara jobonita bo ka zukzuk byitaha! Myraratsa harasukpetara bo ka dodo byitaha. Estuba harasukpetara mydo zeka tsibezekta! Haraharetsa tysipaparanahaktsa iwatahi tsibezenaha — niy. Ana harere pokso sipybyrētsa. ²¹ Moises niwatihi tsipybyrēta. Hara bete niapykykze nanabyi bo nikozokoze ana pokso hi tsipybyrēta:

— Nanabyi bo ikozoze ana pokso mytydy-dykyktu. Kapybyrēta mykara — niy.

22 Niwazuba! Ikiahatsa batu siwatsa tsimaha. Deus harere tsipiwabynahaze ahapybybihu ja. Ikiahatsa usta hara bo jobonikita bo tsikzumunaha. Ata hara Siaõ inarokoha, anaeze hi Serusarêhe hudikhudikwy my. Deus koikny baktatu isapy bo tsikzumunaha. Isapy Serusarêhe inarokoha bijoikpe eze kino niwatihi. Anabo hi tsikzumunaha. Anaeze Deus tsumuêhĩtsita mynapykyknaha, bijoikpezektsa sizubarêtsa mynapykyryknaha. Deus humo sakurêtsa nikaranaha.

23 Kiristu Deus zipehata ityryktsa bo tsikzumunaha. Siwatsa ityryktsa tsimaha niwatihi. Sizubarêtsa Deus tyryktsa maha. Tapara taypykta tawata myhyrizikwanitsa moziknaha. Deus papeu humo sinaro ziwatahaka ana papeu bijoikpe eze tu my iwatsahi sakurêtsa hỹ. Ikiahatsa Deus bo tsikzumunaha. Atakta kytsa huak ty sizubarêna ty nyny my. Asaktsa mybarawy ezektsa wasani ziknakaranaha, iwatahi isapyrênikia ty sibo nyny my, tahawahi Deus tuk mynapykyryknaha. Utsa mybarawy ezektsa simysapybyitsa tu ziknakaranaha Deus sinini ykarawy bo mysipeha. Ikiahatsa sihyrizikararawytsa bo tsikzumunaha. Asahi Deus humo simysapyrêtsa niyziknaha.

24 Sesus mytsapuhyripyrywyta bo tsikzumunaha. Ata humo hi mysapyrêtsa tsimoziknaha. Abaka Deus harere mybo nitsasoko. Nihyrikosokda iwatsahi ispu humo mysapyrêtsa tsimoziknaha. Hawa taparaktsa siraratsa spu Deus bo wabehyryk ziknakaranaha, katsaktsa Sesus spu humo mysapyrêtsa tsimoziknaha ispu tisapyrêna hỹ.

Kaĩ tatsy zibezehik iwatsahi ispu humo mytsaty tsimykarannahaze. Katsa Deus pe tsimaha:

— O Deus ikia Abeu spu tsipitsapusare tsimaha. Sesus mysapyzekenihyrikosokda iwatsahi ispu bo mytsaty tsimykarannahaze, Deus pe tsimaha:

“O Deus mysapybyitsatu tsikykarannaha iwatahi Sesus spu humo tsimymyokzo” tsimaha.

²⁵ Iwatsahi Deus harere bo wabyziutahaktsa! Tubabatu Deus hara Sinija inarokoha bo niy. Moises Deus harere taparaktsa bo nisihyrinymyryikik. Batu hỹ — niaha. Iwatsahi sinini ziknakaranaha, sihuak ty Deus sibo nyny niy. Batu siaku. Abaka Deus bijoikpe ikny mymyhyrinymyryky. Iharere bo yhỹ ahabyi zeka sinini tsimykarannaha hỹ. ²⁶ Sinija jobonita bo izumuze kytsa bo nitsaso, nitsasokoze mybarawy nitydydykyk tu. Abaka mytuk mopamykysokozo atahi:

— Mybarawy pitydydywyzo. Mybarawy pitydydywyzoze. Bijoikpe kino niwatihi pitydydywyzo — niy. ²⁷ Deus hi:

— Estuba zuba mybarawy pitydydykyzo — niy. Iwatahi mybarawy nizukni hana bo ja meky watu mozikzo. Mybarawy bijoikpe kino niwatihi izikwy humo ezytyk mozikzo. Itydydykokbara zuba motare. ²⁸ Deus hudikhudikwy ba zihokza, anaka itydydykokbara. Deus myzubaha bo abazubata mozik ba hawa tohi zikzukninaha. Anaeze ituk tsinapykyryknaha. Iwatsahi Deus bo tsimsakibazikiknahaktsa kytsa!

— O Deus ikia zuba apunihikrēnikita. Ikia zuba amysapyrēnikita ahumo ka mykurētsa hỹ. Abaka

mywahi atuk tsimynapykyryknaha ana humo hi mykurētsa — tsimaha.

O kytsa iharere humo pykyhytu wabyziutahaktsa! Hawa ha ty mozihihik naha ty zuba tsimahaktsa! Atahi abazubata ihumo mypybyrētsa iwatsahi iharere bo zuba hyĩ tsimykaranaha. ²⁹ Deus harere bo hyĩ tsimykaranaha ihumo myspirikporētsa. Izo mokorobaik nahawa. Deus izo waha, asaktsa iharere bo yhĩ ahabyizeka nasipykwy izo waha hỹ.

13

Hawa tsimyzurukunaha Deus myhumo tsakurēta.

¹ Kyze ikiahatsa Sesus tuktsa tyharape pokzitsikinahaktsa! ² Sisukmotsa ahawahoro bo mozumunaha zeka ikiahatsa hi:

— Mywahoro bo paku paku tynaha ahawanu ty haĩ haĩ taha — tsimaha. Sihumo ahamypokzitsirētsa tsimaha. Tubabatu wastuhu kytsa sisukmotsa pe:

— Paku paku taha — niaha. Sisukmotsa zubitsa ja nikaranaha asahi bijoikpe iknyktsa Deus tsumuēhĩtsa niaha.

³ Asaktsa sakyriukrēnikitsa hurukwy eze niapykyryknaha sibo mytsatyziu tsimykaranaha! Sibaze tu watsa sibo mytsaty tahaktsa! Tysisapywykynahaktsa. Kytsa sinini mykaranahaze sibo mytsatyziutahaktsa! Ahape tu tsimykaranaha:

— Tozeka ja katsa kino niwatihi sinini tsimykaranaha — tsimaha. Iwatsahi tysisapywykynaha.

⁴ Ikiahatsa hi tsikaha:

— O katsa tsimymysukzanahaze wasani tsimaha — tsikaha. Wasani hiba. Aty ustatsa pihuahua tsihikikze batu isopyksapy my. Amatatsa ustatsa barikta pihuahua tsihikikze batu isopyksapy my. Iwa tsimyzurukunaha zeka Deus pahamyitsapyriwyky.

⁵ Ahaokyraro soho bo ka mytsaty mytsaty byitahaktsa! Ahanamy humo ahakurëtsa ana kino tsikaeni zuba tuzihikiknaha! Deus hi ahape my:

— Utakta ahapok baze tu mynapykyryk, iki-ahatsa kakparawy iwatahi ba zahaerek — my. Iharere humo ahakurëtsa hÿ. Deus ahasoho humo ba zikspiriktsokda. ⁶ Iwatsahi ahapunihikrëtsa tsimoziknaha. Ustsaktsa sipybyrëtsa pe:

— Mypehakatsa mymytsumuëhĩkĩ.

Kytsa pokso batu mypyby.

Hawa kytsa mybo mykaranaha ana pokso batu mypyby.

Deus hi myhumo tsimypokzitsiukrëta mynakara — tsimaha.

⁷ Ahapehatsa soho bo mytsaty tahaktsa! Tubabatu Deus taharere ty zahahyrinomyrykynaha. Hawa zikzurukunahaze ahaspiriktsokdabyihu ja. Hawa wasani ziknakaranaha. Nihyrikosokdanahaze Deus humo sispirikporëtsa hÿ. Siwa tahaktsa kytsa! Ikiahatsa kino Deus humo tyspirikpotohinaha.

⁸ Sesus Kiristu kino atahi my. Hawa tapara ziknakara aba kino niwatihi mynakara. Aiba eze kino niwatihi astatu mynakara. Koikny baktatu mykara hÿ.

⁹ Utsa kytsa siharere pahahyrinymyrykynaha zeka siharere meky watu maha. Deus harere humo batu zahahyrinymyry. Mydisahawy soho humo pahahyrinymyrykynaha. Pahaspihik-batakanaha. Siraratsani tsimymydisahakanaha zeka wasani my. Siraratsani ty hauk ahabyizeka wasani my. Deus harere humo zuba mysapyrëtsa tsimoziknaha atahi mymysapywyky hÿ.

¹⁰⁻¹¹ Tubabatu Deus wahoro zubata eze taparaktsa ziknapamykysonahatsa iwa ziknakaranaha. Siraratsa nisibaiknaha mysopyksapybyitsa tsikykaranaha humo nisibaiknaha. Deus siraratsa spu bo iktsa niyze iwatahi nisiokzohik. Iwaze siraratsa spu Deus imysapyrënikia bo zibykyryk.

— Taparakta ziknapamykysokota imysapyrënikia bo nitsuk — niaha. Anaeze Deus siraratsa spu bo iktsa niyze taokaniki iwata tu kytsa sisopyksapybyitsa nikaranaha humo nisiokzohik. Kytsa siraratsa nurytsa nokponi ziknasiskiknaha. Sihudikhudikwy bara botu nasiskiknaha. Anaeze nisiwezokonaha. Batu sizoho ziboronaha.

Siraratsa wata Sesus nihyrikosokda. Mysapyzeyky nihyrikosokda iwatsahi ihumo mysapyrëtsa tsimoziknaha. Hawa siraratsa nurytsa sihudikhudikwy bara botu ziknasiskiknaha, iwaze Sesus nihyrikosokdaze, kytsa sihudikhudikwy bara botu zibezonaha. Deus ispu bo iktsa niyze iwatahi mysapybyitsa tsikykaranaha nimyokzohik.

¹² Sihudikhudikwy bara botu nihyrikosokda. Kytsa sispirikpobyitsa tu nizukyryknaha. Anaeze

iharapatawyhyta humo zihyritzikiknaha. Iwaze mysapyzekenihyrikosokda. ¹³ Iwatsahi Sesus wata tsimahaktsa! Mysapyzekenihyrikosokda. Iwatsahi hawa Sesus mozihikikze tsimaha. Kytsa myharere bo yhy ahabyizeka wasani my. Mymymyjakanaha zeka wasani my. Iwatahaktsa!

¹⁴ Katsaktsa mybarawy eze tu tsimyzurukunaha, mysapy eze tu tsimynapykyrykspyknaha hawa eze tamiwy. Usa hudikhudikwy taberi. Bijoikpe myhudikhudikwy baba mozik. Ana hi mysapy mozik. Anaeze Deus tuk tsimynapykyryknaha. ¹⁵ Iwatsahi Deus bo tsimysakibaziknahaktsa! Katsa hi:

— O Deus myzo Sesus humo ikia bo tsimypamykysokonaha. Ikia zuba amysapyrēnikita. Ikia zuba abazubata. Ikia humo ka mykurētsa tsimoziknaha — tsimykaranaha. Ana hi Deus piwabyze tsakurēta mozik. Tubabatu kytsa siraratsa ty Deus bo nyny ziknakanaha. Abaka myraratsa ty ba nynyzo zikaha. Abaka myharere ty ibo tsimytsasokonaha. Iwatahi myharere humo tsakurēta mozik.

¹⁶ Sinamybyikitsa tysitsumuēhīnahaktsa! Asaktsa batu sidisahawyky ahadisahawy ty sibo nyny-taha. Kytsa bo tysisapywykynahaktsa! Ahaspiriktsokda byihuja. Iwatahi Deus ahahumo tsakurēta mozik.

¹⁷ Ahapehatsa harere bo ma tynakanahaktsa! Siharere humo pykyhytutaha hyhy tsimykaranaha. Ahahyritzikararawytsa humo simypokzitsiukrētsa. Deus bo hawa pahapokzitsikinaha zeka motsasokonaha. Myzaharapokzitsikinaha iwaze ahamysapyrētsa tsimoziknaha. Iwatsahi

pahatsumuēhĩ tsihikiknaha. Siharere bo ma tsimykaranaha zeka sakurētsa maha. Siharere bo yhỹ ahabyi zeka sisukatsihikrētsa maha. Iwa zeka ba zatsumuēhĩnaha.

¹⁸ O kytsa mytsyhyryze Deus bo ty-pamykysokonahaktsa! Deus okzeka wasaniha humo zuba tsimyzihikiknaha. Mypetu mysopyk iwatsahi batu tyso. — Sozeka ja wasani tsizurukunaha. Batu mynyhy — iwatahi batu tyso. Katsaktsa Deus okzeka wasani tsimykaranaha ana humo hi myhyrinymyrētsa hỹ.

¹⁹ O kytsa ahabo myziksi tsihikikzo. Deus bo katsyhyryze typamykysonahaktsa! Ikiahatsa hi:

— O Deus myzo aidytynykta mybo tyziksizo — tsimaha.

Deus bo mopamykysoko.

²⁰ Uta Deus bo ahatsyhyryze mopamykyso:

— O Deus ikia humo zuba sakurētsa moziknaha. Ikia hi mypehatsa Sesus tsikzihyrizikpowy. Abaka sihumo tsimypokzitsiukrēta hozipyrykza perytša wata atahi hozipyrykzatsa mysiperyky my. Sisapyzekenihyrikosokda iwatsahi meky watu niyziknaha, ihumo simysapyrētsa niyziknaha iwatsahi atuk tawahi mynapykyryknaha hỹ.

²¹ Myzo aharere bo zuba hyỹ tynakaranaha, ana humo kino tysitsumuēhĩ! Hawa tsimyzihikik ana humo kino tysizikwykyrykta. Ahumo sipunihikrētsa moziknaha. Hawa tisapyrēna humo tysitsumuēhĩkĩ. Asahi:

“Sesus Kiristu ikia amysapyrēnikita. Ikia zuba tsahyryzikporēta” iwa tawahi mykaranaha ana hi myzo bo myzapykyky — my.

Iwa Deus bo ahatsyhyryze mopamykysoko.

Abaka pepykbaka.

²² Kyze katukytsa kaharere tsiwabytoktonahaktsa! Utakta pahakusukniki iwatsahi ikiahatsa Sesus tuktsa babatsa tsimoziknaha ana humo hi papeu humo ahabo piwatahaka. Kahumo ja ahakubyrisorokok kawatahaha pykyhytu tsipinymyrynaha. Kapapeu humo jokboha zuba iwatahaka. ²³ Mytsy Timoteo soho tawaby tsihikik. Sakyriukrēnikitsa hurukwy ekze zoihik. Iwatahi piperyky. Mozumu zeka ituk ahabo tsimynakozorenaha.

²⁴ Katsaktsa ahapehatsa bo, Sesus tuktsa sizubarētsa pe:

— O mytukytsa ahahumo myhyrizikbarētsa — tsimaha. Sesus tuktsa Itaria ezektsa kino niwatihi ahahumo sihyrizikbarētsa.

Deus pahasapywyky.

²⁵ Ahatsyhyryze Deus bo mopamykysoko. — O myzo tysisapywyky sihumo amypokzitsiukokta! — my. Niwazuba.

Deus Harere Aibaky Sesus mymyspirikpoko naha

New Testament in Rikbaktsa (BR:rkb:Rikbaktsa)

copyright © 2011 Wycliffe Bible Translators, Inc.

Language: Rikbaktsa

Translation by: Wycliffe Bible Translators, Inc.

Rikbaktsa [rkb], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Rikbaktsa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

2f0260ea-5969-5180-9ac5-183d63a989f1